

Broj: 03-02-600/2024  
Sarajevo, 31.01.2025. godine

PARLAMENT FEDERACIJE  
BOSNE I HERCEGOVINE

- Predstavnički dom -  
gosp. Dragan Mioković, predsjedavajući
- Dom naroda -  
gosp. Tomislav Martinović, predsjedavajući

Bosna i Hercegovina  
Federacija Bosne i Hercegovine  
PARLAMENT FEDERACIJE  
SARAJEVO

Primijeno: 04-02-2025			
Org. jed.	Broj	Priloga	Vrijednost
01,02	-02-	414	25

Poštovani,

U skladu sa članom IV.B.3.7.c) (III) Ustava Federacije BiH, a u vezi sa odredbama čl. 163, 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i čl. 155, 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), **radi razmatranja i prihvatanja, dostavljam Vam NACRT ZAKONA O PROFESIONALNOJ REHABILITACIJI I ZAPOSŁJAVANJU LICA SA INVALIDITETOM**, koji je utvrdila Vlada Federacije Bosne i Hercegovine na 43. sjednici, održanoj 19.11.2024. godine.

Nacrt zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



Prilog:

- Nacrt zakona na bosanskom jeziku,
- Izjava o usklađenosti,
- Obrazac br. 2,
- Obrazac IFP-NE,
- Mišljenje/Zaključci kantona

Co: Federalno ministarstvo rada i socijalne politike  
gosp. Adnan Delić, ministar

Warrant of Arrest  
County of ...  
State of ...

Name of Defendant		Date of Birth	
[Illegible]		[Illegible]	
Address		City	
[Illegible]		[Illegible]	
Signature of Officer		Signature of Judge	
[Illegible]		[Illegible]	

Handwritten signature and initials in blue ink.

„E1“

BOSNA I HERCEGOVINA  
FEDERACIJA BOSNE I HERCEGOVINE  
VLADA

NACRT

ZAKON  
O PROFESIONALNOJ REHABILITACIJI I ZAPOŠLJAVANJU LICA SA  
INVALIDITETOM

Sarajevo, novembar 2024. godine

**ZAKON  
O PROFESIONALNOJ REHABILITACIJI I ZAPOŠLJAVANJU LICA SA  
INVALIDITETOM**

**DIO PRVI – OSNOVNE ODREDBE**

Član 1.  
(Predmet Zakona)

- (1) Ovim Zakonom uređuje se profesionalna rehabilitacija i zapošljavanje lica sa invaliditetom, osnivanje i djelatnost ustanova, privrednih društava i drugih pravnih lica koja se bave profesionalnom rehabilitacijom i zapošljavanjem lica sa invaliditetom, rad Fonda za profesionalnu rehabilitaciju i zapošljavanje lica sa invaliditetom (u daljnjem tekstu: Fond), način kontrole uplate posebnog doprinosa za zapošljavanje lica sa invaliditetom i druga pitanja u vezi sa profesionalnom rehabilitacijom i zapošljavanjem lica sa invaliditetom.
- (2) Ovim zakonom stvaraju se uslovi za zapošljavanje lica sa invaliditetom pod općim i posebnim uslovima i njihovo ravnopravno učešće na tržištu rada, uz otklanjanje barijera i stvaranje jednakih mogućnosti.

Član 2.  
(Usklađivanje sa pravnim aktom Europske unije)

Ovim zakonom se vrši djelomično usklađivanje sa Direktivom Vijeća 2000/78/EZ od 27. novembra 2000. godine o uspostavi općeg okvira za jednako postupanje pri zapošljavanju i obavljanju zanimanja, u pravnom poretku Federacije Bosne i Hercegovine, u dijelu koji se odnosi na zapošljavanje lica sa invaliditetom.

Član 3.  
(Definicije pojmova)

- (1) Pojmovi koji se koriste u ovom zakonu imaju sljedeće značenje:
  - a) **lice sa invaliditetom** je lice kod kojeg postoji tjelesno, čulno ili mentalno oštećenje koje za posljedicu ima trajno smanjenu mogućnost rada i zadovoljavanja ličnih potreba u svakodnevnom životu;
  - b) **poslodavac** je pravno ili fizičko lice sa kojim lice sa invaliditetom zaključuje ugovor o radu, odnosno zasniva radni odnos;
  - c) **profesionalna rehabilitacija** je skup mjera i aktivnosti koje se izvode s ciljem osposobljavanja lica sa invaliditetom za odgovarajući posao, da se zaposli, posao zadrži i u njemu napreduje ili promijeni zanimanje;
  - d) **poseban doprinos za zapošljavanje lica sa invaliditetom** je novčani iznos koji su poslodavci dužni obračunavati i uplaćivati Fondu, ukoliko ne zapošljavaju lica sa invaliditetom na način propisan ovim zakonom;
  - e) **privredno društvo za zapošljavanje lica sa invaliditetom** je privredno društvo koje se osniva radi zapošljavanja lica sa invaliditetom koja se ne mogu zaposliti na tržištu rada pod općim uslovima, te koje ispunjava uslove iz ovog zakona za sticanje statusa privrednog društva za zapošljavanje lica sa invaliditetom;

- f) **zaštitna radionica** je privredno društvo za zapošljavanje lica sa invaliditetom u kojoj se pod posebnim uslovima zapošljavaju lica sa invaliditetom sa najvećim stepenom invaliditeta, te koja ispunjava uslove iz ovog zakona za sticanje statusa zaštitne radionice;
  - g) **organizacija lica sa invaliditetom** je organizacija, odnosno udruženje kojem je u skladu sa posebnim propisom priznat status organizacije lica sa invaliditetom.
- (2) Pojmovi koji se koriste u ovom zakonu, a imaju rodno značenje koriste se neutralno i odnose se jednako na muški i ženski rod.

#### Član 4. (Korisnici prava)

- (1) Lice sa invaliditetom iz ovog zakona je lice čiji invaliditet u odnosu na sposobnosti lica bez invaliditeta, jednake ili slične životne dobi, jednakog ili sličnog obrazovanja, u jednakim ili sličnim uslovima rada, na jednakim ili sličnim poslovima ima za posledicu trajno smanjenu mogućnost radnog osposobljavanja i zapošljavanja na tržištu rada pod općim uslovima, te očuvanje posla i napredovanje u poslu.
- (2) Lice sa invaliditetom je, u smislu ovog Zakona, i:
- a) lice sa promijenjenom radnom sposobnošću prema propisima o penzijskom i invalidskom osiguranju i
  - b) učenik sa teškoćama u razvoju i učenik sa većim teškoćama u razvoju prema propisima o srednjem obrazovanju.

#### Član 5. (Utvrđivanje invaliditeta, smanjene i preostale radne sposobnosti)

- (1) Invaliditet, smanjenu i preostalu radnu sposobnost lica iz člana 4. ovog zakona utvrđuje Institut za medicinsko vještačenje zdravstvenog stanja (u daljem tekstu: Institut).
- (2) Postupak utvrđivanja invaliditeta, smanjene i preostale radne sposobnosti pokreće se na zahtjev lica sa invaliditetom ili nadležnog doktora medicine primarne zdravstvene zaštite.
- (3) Inicijativu za podnošenje zahtjeva za pokretanje tog postupka mogu dati: nadležni doktor medicine u primarnoj zdravstvenoj zaštiti, roditelj, socijalni radnik, defektolog, psiholog i poslodavac.

#### Član 6. (Doprinos lica sa invaliditetom)

- Lice sa invaliditetom doprinosi svojoj profesionalnoj rehabilitaciji i zapošljavanju:
- a) školovanjem i stručnim osposobljavanjem, zavisno od svojih mogućnosti, sklonosti i sposobnosti,
  - b) prijavljivanjem na oglase o zapošljavanju na poslove za koje ispunjava predviđene uslove i koje je u stanju obavljati i prihvatanjem ponuđenog zaposlenja na takvim poslovima,
  - c) prihvatanjem uslova u toku stručnog osposobljavanja i rada,

- d) saradnjom po pitanjima stručnog osposobljavanja sa ljekarom, defektologom, psihologom, socijalnim radnikom, dipl. pravnikom, tehnologom i dr. stručnim licima,
- e) prihvatanjem ponude za promjenu radnog mjesta, odnosno rasporeda na druge odgovarajuće poslove zbog prestanka potrebe ili nemogućnosti obavljanja dosadašnjih poslova,
- f) stručnim osposobljavanjem tokom rada, po potrebi i dokvalifikacijom i prekvalifikacijom radi zadržavanja zaposlenja.

## **DIO DRUGI – PROFESIONALNA REHABILITACIJA I OSPOSOBLJAVANJE LICA SA INVALIDITETOM**

### **Član 7.**

(Pravo na profesionalnu rehabilitaciju i ospobljavanje)

Lice sa invaliditetom ima pravo na profesionalnu rehabilitaciju s ciljem osposobljavanja tog lica za odgovarajući posao, njegovog zapošljavanja, te zadržavanja, odnosno napredovanja u tom poslu i profesionalnog razvijanja.

### **Član 8.**

(Mjere i aktivnosti profesionalne rehabilitacije)

Profesionalna rehabilitacija, u smislu ovog zakona, obuhvata naročito sljedeće mjere i aktivnosti:

- a) utvrđivanje preostalih radnih i općih sposobnosti,
- b) profesionalno informisanje, savjetovanje i procjenu profesionalnih mogućnosti,
- c) analizu tržišta rada, mogućnosti zapošljavanja i uključivanja u rad,
- d) procjenu mogućnosti izvođenja, razvoja i usavršavanja programa profesionalnog osposobljavanja,
- e) radno osposobljavanje, dokvalifikaciju, prekvalifikaciju, održavanje i usavršavanje radnih sposobnosti do zaposlenja,
- f) izradu plana potrebne opreme i sredstva za rad,
- g) informisanje i savjetovanje o pomoćnoj tehnologiji u učenju i radu,
- h) pojedinačne i zajedničke programe za uključivanje lica sa invaliditetom u zajednicu,
- i) prijedloge o primjeni različitih tehnologija i tehnika u učenju i radu, uz procjenu mogućnosti primjene,
- j) razvoj motivacije i osposobljavanja lica sa invaliditetom o korištenju odabrane tehnologije,
- k) informisanje i podršku u izvorima finansiranja,
- l) pripremanje i stručnu pomoć pri osposobljavanju i obrazovanju,
- m) tehničku pomoć, podrška, praćenje i procjenu rezultata u primjeni ovih mjera i aktivnosti,
- n) pripremanje lica sa invaliditetom na radnom mjestu po zaposlenju i druge mjere i aktivnosti od značaja za profesionalnu rehabilitaciju lica sa invaliditetom.

## Član 9.

(Priznavanje prava na profesionalnu rehabilitaciju lica sa invaliditetom)

- (1) O priznavanju prava na profesionalnu rehabilitaciju u prvom stepenu odlučuje kantonalna služba za zapošljavanje nadležna prema prebivalištu lica sa invaliditetom.
- (2) Postupak za priznavanje prava iz stava (1) ovog člana pokreće se na osnovu zahtjeva lica sa invaliditetom.
- (3) Uz zahtjev se prilaže dokaz o utvrđenom invaliditetu, odnosno smanjenoj i preostaloj radnoj sposobnosti.
- (4) O žalbi protiv prvostepenog rješenja službe iz stava (1) ovog člana odlučuje kantonalno ministarstvo nadležno za rad i socijalnu politiku.

## Član 10.

(Izvođenje profesionalne rehabilitacije)

- (1) Profesionalnu rehabilitaciju organizira i izvodi ustanova za profesionalnu rehabilitaciju, srednja škola, posebna škola, privredno društvo za zapošljavanje lica sa invaliditetom ili drugo pravno lice koje ispunjava uslove za profesionalnu rehabilitaciju u skladu sa ovim Zakonom (u daljem tekstu: pravni subjekat za izvođenje profesionalne rehabilitacije), po općim, prilagođenim ili posebnim programima.
- (2) Sredstva za profesionalnu rehabilitaciju i zapošljavanje lica s invaliditetom osiguravaju se iz sredstava:
  - a) Fonda,
  - b) Federalnog zavoda za zapošljavanje i kantonalnih službi za zapošljavanje,
  - c) Federalnog zavoda za penzijsko i invalidsko osiguranje,
  - d) Budžeta Federacije, kantona, grada i općina,
  - e) pravnih lica – poslodavaca.
- (3) Za korištenje sredstava iz stava (2) ovog člana primjenjuju se propisi iz oblasti koje regulišu rad subjekata stava (2) ovog člana i propisi koji utvrđuju prava lica sa invaliditetom. U finansiranju profesionalnog osposobljavanja i zapošljavanja lica sa invaliditetom mogu učestvovati i drugi pravni subjekti.
- (4) Federalni ministar rada i socijalne politike (u daljem tekstu: federalni ministar) će propisati bliže uslove, način finansiranja i opća načela u vezi sa provođenjem mjera i aktivnosti profesionalne rehabilitacije.

## Član 11.

(Ustanova za profesionalnu rehabilitaciju)

- (1) Ustanova za profesionalnu rehabilitaciju, u smislu ovog zakona, je ustanova za organiziranje i provođenje profesionalne rehabilitacije lica sa invaliditetom, u skladu sa odredbom člana 8. ovog zakona.
- (2) Ustanovu mogu osnovati Federacija, kanton, jedinica lokalne uprave, Federalni zavod za zapošljavanje, udruženje lica sa invaliditetom, humanitarna organizacija, vjerska zajednica i druga pravna i fizička lica.
- (3) Bliže uslove za osnivanje i rad ustanove, posebno u pogledu prostora, opreme i stručnog kadra, propisuje kantonalni ministar nadležan za poslove socijalne zaštite.
- (4) Sredstva za rad ustanove osiguravaju osnivač i Fond.

- (5) Ustanova može ostvariti prihode i pružanjem usluga korisnicima, prodajom proizvoda nastalih u toku profesionalne rehabilitacije, od poklona, legata i drugih izvora u skladu sa aktom o osnivanju ustanove.
- (6) Organ upravljanja u ustanovi za profesionalnu rehabilitaciju lica sa invaliditetom je upravni odbor koji broji pet članova, od njih najmanje jedan član treba da bude lice sa invaliditetom. Rad organa upravljanja u ustanovi za profesionalnu rehabilitaciju je javan, izuzev kada se radi o pitanjima lične prirode lica sa invaliditetom.
- (7) Organ rukovođenja u ustanovi za profesionalnu rehabilitaciju je direktor. Za direktora ustanove može biti imenovan državljanin Bosne i Hercegovine koji ima visoku stručnu spremu VII stepen, odnosno visoko obrazovanje prvog ciklusa ili drugog ili trećeg ciklusa Bolonjskog sistema studiranja, i najmanje pet godina radnog iskustva na poslovima rukovođenja, te tri godine iskustva u oblasti prava i zaštite lica sa invaliditetom. Statutom ustanove se preciziraju opći i posebni uslovi za postupak izbora i imenovanja direktora.
- (8) Organ kontrole poslovanja u ustanovi za profesionalnu rehabilitaciju lica sa invaliditetom je nadzorni odbor koji broji tri člana, od njih najmanje jedan član treba da bude lice sa invaliditetom.
- (9) Na rad i djelovanje, te postupak imenovanja i razrješenja organa iz st. (6), (7) i (8) ovog člana primjenjuju se važeći propisi i opći akt ustanove za profesionalnu rehabilitaciju.

## **DIO TREĆI – ZAPOŠLJAVANJE LICA SA INVALIDITETOM**

### **Član 12.**

(Pravo na zapošljavanje)

- (1) Pravo na zapošljavanje, u smislu ovog zakona, ima lice sa invaliditetom kod kojeg je utvrđena smanjena, odnosno preostala radna sposobnost.
- (2) Ako se radno osposobljavanje vrši dokvalifikacijom ili prekvalifikacijom lica sa invaliditetom radi njegovog zapošljavanja, taj vid radnog osposobljavanja može ostvariti lice sa invaliditetom do navršenih 65 godina života i koje se, s obzirom na prirodu i vrstu preostale radne sposobnosti, može osposobiti za rad na odgovarajućem poslu sa punim radnim vremenom, što utvrđuje Institut.

### **Član 13.**

(Zapošljavanje pod općim i posebnim uslovima)

Lica sa invaliditetom zapošljavaju se i rade na tržištu rada pod općim i posebnim uslovima u skladu sa ovim zakonom.

### **Član 14.**

(Primjena propisa iz oblasti rada i zaštite na radu)

Lice sa invaliditetom zasniva radni odnos i ostvaruje svoja prava i obaveze u skladu sa propisima o radu, drugim propisima, kolektivnim ugovorom i pravilnikom o radu.



Član 15.  
(Obavljanje rada izvan prostorija poslodavca)

Lica sa invaliditetom koja se zapošljavaju i rade na tržištu rada pod općim i posebnim uslovima, mogu poslove iz ugovora o radu obavljati i izvan prostorija poslodavca (kod kuće radnika ili u drugom prostoru koji osigura radnik), na način propisan Zakonom o radu („ Službene novine Federacije BiH“, br. 26/16, 89/18 i 44/22).

Član 16.  
(Evidencija o nezaposlenim licima sa invaliditetom)

Evidenciju o nezaposlenim licima sa invaliditetom vodi nadležna služba za zapošljavanje u skladu sa propisima o evidencijama u oblasti zapošljavanja u Federaciji.

Član 17.  
(Evidencija o zaposlenim licima sa invaliditetom)

Federalni ministar će propisati način vođenja evidencije o zaposlenim licima sa invaliditetom, sadržaj evidencije, organe nadležne za vođenje te evidencije, obaveze poslodavaca, te druga pitanja od značaja za vođenje evidencije o zaposlenim licima sa invaliditetom.

## **POGLAVLJE I. ZAPOŠLJAVANJE LICA SA INVALIDITETOM POD OPĆIM USLOVIMA**

Član 18.  
(Zapošljavanje pod općim uslovima)

- (1) Lica sa invaliditetom se zapošljavaju pod općim uslovima na otvorenom tržištu rada u državnim organima, organima pravosuđa, organima lokalne uprave, javnim službama, ustanovama, fondovima, javnim preduzećima, privrednim društvima i drugim pravnim licima koja nisu osnovana za zapošljavanje lica sa invaliditetom u skladu sa zakonom.
- (2) Poslodavci iz stava (1) ovog člana dužni su osigurati učinkovite i praktične mjere za prilagođavanje radnog mjesta licu sa invaliditetom, kao što su prilagođavanje prostorija i opreme, rasporeda radnog vremena, raspodjele zadataka ili osiguranjem sredstava za osposobljavanje ili uvođenje u rad.
- (3) Federalni ministar donijet će propis kojim će se utvrditi radna mjesta i poslovi na kojima pri zapošljavanju lica sa invaliditetom, uz zadovoljavanje ostalih potrebnih uslova, prednost imaju lica sa 100% invaliditetom.

Član 19.  
(Prednost pri zapošljavanju)

- (1) Lica sa invaliditetom imaju prednost pri zapošljavanju kod poslodavaca iz člana 18. ovog zakona u okviru javnog sektora, ako pored općih ispunjavaju i posebne uslove za radno mjesto.

- (2) Prednost pri zapošljavanju iz stava (1) ovog člana lica sa invaliditetom ostvaruju pod jednakim uslovima, odnosno ukoliko u okviru procedure za prijem u radni odnos ostvare isti broj bodova kao drugo lice kod kojeg nije utvrđen invaliditet.
- (3) Da bi ostvarilo pravo na prednost pri zapošljavanju, lice sa invaliditetom dužno je uz prijavu na konkurs za prijem u radni odnos, pozvati se na to pravo, te pored dokaza predviđenih konkursom, priložiti i dokaz o utvrđenom statusu lica sa invaliditetom u smislu ovog zakona.
- (4) U slučaju kada dva ili više lica pod uslovima iz stava (2) ovog člana ostvaruju pravo na prednost pri zapošljavanju prema ovom zakonu, poslodavac samostalno donosi odluku o izboru kandidata, uzimajući u obzir potrebe posla, te interes i motivaciju kandidata.
- (5) Ako nadležna inspekcija utvrdi da je zaključivanjem ugovora o radu nakon okončane konkursne procedure povrijeđeno pravo na prednost pri zapošljavanju lica s invaliditetom, rješenjem će utvrditi povredu prava prednosti pri zapošljavanju, a izvršno rješenje kojim je utvrđena povreda prava prednosti pri zapošljavanju predstavlja osnov za prestanak ugovora o radu čijim je zaključivanjem to pravo povrijeđeno.

#### Član 20.

(Uplata doprinosa za zapošljavanje lica sa invaliditetom)

- (1) Prilikom zapošljavanja lica sa invaliditetom pod općim uslovima poslodavci iz člana 18. ovog zakona dužni su ta lica zapošljavati srazmjerno ukupnom broju zaposlenih u tom subjektu i to:
  - a) do 31. decembra 2024. godine najmanje jedno lice sa invaliditetom na svakih 17 zaposlenih,
  - b) do 31. decembra 2025. godine najmanje jedno lice sa invaliditetom na svakih 18 zaposlenih,
  - c) do 31. decembra 2026. godine najmanje jedno lice sa invaliditetom na svakih 19 zaposlenih,
  - d) do 31. decembra 2027. godine i dalje najmanje jedno lice sa invaliditetom na svakih 20 zaposlenih.
- (2) Obaveza iz stava (1) ovog člana, ne odnosi se na strana diplomatska i konzularna predstavništva, novoosnovane poslodavce za period do 12 mjeseci poslovanja, te poslodavce iz člana 22. ovog zakona, koji zapošljavaju lica s invaliditetom pod posebnim uslovima i organizacije lica s invaliditetom.
- (3) Subjekti koji ne ispune obavezu iz stava (1) ovog člana, dužni su mjesečno, pri isplati plaća, obračunati i uplatiti u Fond poseban doprinos za zapošljavanje lica sa invaliditetom u novčanom iznosu u visini 25% prosječne neto plaće u Federaciji prema posljednjem objavljenom podatku Federalnog zavoda za statistiku, i to za svako lice s invaliditetom koje su bili dužni zaposliti u skladu sa stavom (1) ovog člana.
- (4) Izuzetno od st. (1) i (2) ovog člana, ako poslodavac zapošljava lice sa invaliditetom od najmanje 90% invaliditeta, u pogledu obaveze zapošljavanja iz stava (1) ovog člana, smatra se kao da je zaposlio dva lica sa invaliditetom.
- (5) Kontrolu obračuna i uplate posebnog doprinosa za zapošljavanje lica sa invaliditetom iz stava (3) ovog člana vrši Porezna uprava Federacije BiH. U svrhu obavljanja obračuna uplate posebnog doprinosa, Porezna Uprava Federacije BiH dužna je Fond uvrstiti u listu korisnika Jedinственog sistema

registracije, kontrole i naplate doprinosa, a u cilju efikasne kontrole naplate doprinosa, razmjene podataka o doprinosima, kontrole uplate doprinosa i dostavljenih podataka.

- (6) Poseban doprinos iz stava (3) ovog člana se obračunava i dospijeva na naplatu posljednjeg dana u mjesecu za prethodni mjesec.
- (7) Na obavezu iz stava (3) ovoga člana i obavezu plaćanja zatezne kamate u slučaju neplaćanja posebnog doprinosa u propisanom roku, zastaru prava na obračun posebnog doprinosa, te zastaru prava na naplatu posebnog doprinosa, primjenjuju se posebni propisi kojima se uređuju doprinosi za obavezna osiguranja, kao i opći porezni propisi te provedbeni propisi doneseni na osnovu istih, ako ovim zakonom nije drugačije propisano.

#### Član 21.

(Obaveze poslodavca sa manjim brojem zaposlenih)

- (1) Poslodavci koji ne podliježu obavezi zapošljavanja lica sa invaliditetom iz člana 20. ovog zakona, mogu zapošljavati ta lica na odgovarajuće poslove u skladu sa ovim zakonom i po tom osnovu ostvariti određene stimulanse i povlastice u skladu sa zakonom.
- (2) Poslodavci iz stava (1) ovog člana dužni su svakog mjeseca prilikom isplate plaća uplaćivati u Fond poseban doprinos za zapošljavanje lica sa invaliditetom u visini 0,5% od iznosa isplaćene mjesečne bruto plaće svih zaposlenih, izuzev ako zapošljavaju lica sa invaliditetom u skladu sa članom 20. st. (1) i (4) ovog Zakona.
- (3) Odredba iz stava (2) ovog člana ne odnosi se na poslodavce koji ispunjavaju uslove iz člana 20. stav (1) ovog zakona, te na strana diplomatska i konzularna predstavništva, privredna društva za zapošljavanja lica sa invaliditetom, zaštitne radionice i organizacije lica sa invaliditetom.

## **POGLAVLJE II. ZAPOŠLJAVANJE LICA SA INVALIDITETOM POD POSEBNIM USLOVIMA**

#### Član 22.

(Zapošljavanje pod posebnim uslovima)

- (1) Lica sa invaliditetom se zapošljavaju pod posebnim uslovima u privrednom društvu koja su osnovana radi zapošljavanja lica sa invaliditetom.
- (2) Pod posebnim uslovima iz ovog člana smatraju se i uslovi koji su prilagođeni psihofizičkim i drugim sposobnostima lica sa invaliditetom.
- (3) Pod zapošljavanjem pod posebnim uslovima, u smislu ovog zakona, smatra se i zapošljavanje u organizacijama lica sa invaliditetom i samozapošljavanje (pokretanje obrta, obavljanje samostalne djelatnosti i obavljanje poljoprivredne djelatnosti kao jedinog i glavnog zanimanja).
- (4) U slučaju samozapošljavanja i rada u samostalnoj djelatnosti vlastitim sredstvima ili sredstvima članova porodice, lica sa invaliditetom ostvaruju prava na olakšice u skladu sa ovim zakonom i drugim propisima, te olakšice prilikom registracije djelatnosti.

#### Član 23.

(Pravo na zapošljavanje pod posebnim uslovima)

Pravo na zapošljavanje pod posebnim uslovima imaju lica sa invaliditetom od najmanje 60% invaliditeta.

### **DIO ČETVRTI – PRIVREDNO DRUŠTVO ZA ZAPOŠLJAVANJE LICA SA INVALIDITETOM I ZAŠTITNA RADIONICA**

#### Član 24.

(Privredno društvo za zapošljavanje lica sa invaliditetom)

- (1) Privredno društvo za zapošljavanje lica sa invaliditetom je, u smislu ovog zakona, privredno društvo koje kumulativno ispunjava sljedeće uslove:
  - a) da u odnosu na ukupan broj zaposlenih zapošljava minimalno 50% lica sa invaliditetom iz člana 23. ovog zakona, a najmanje šest lica sa takvim invaliditetom koji su zaposleni na puno radno vrijeme,
  - b) da prosjek stepena invaliditeta svih lica sa invaliditetom iz člana 23. ovog zakona, zaposlenih u tom privrednom društvu, nije manji od 65%,
  - c) da su radna mjesta za lica sa invaliditetom vidljiva kao i njihovo učešće u procesu rada,
  - d) da na adresi gdje je registrovano sjedište privrednog društva, društvo ima ured za ostvarivanje upravljačkih funkcija i odvijanje finansijsko-administrativnog poslovanja,
  - e) da raspolaže sa minimalnim sredstvima komuniciranja u vidu telefonskog priključka i internet priključka, e-maila i uređajima za komunikaciju,
  - f) da je radni prostor u kojem rade lica sa invaliditetom prilagođen potrebama lica sa invaliditetom,
  - g) da postoji opremljenost radnih mjesta u svrhu prilagođenosti radnih mjesta licima sa invaliditetom,
  - h) da su proces rada lica sa invaliditetom i rezultati rada vidljivi i dokazivi, uključujući i rad koji se obavlja od kuće.
- (2) Privredna društva za zapošljavanje lica sa invaliditetom mogu osnovati: Federacija, kantoni, općine, odnosno jedinice lokalne uprave, privredna društva, ustanove, organizacije lica sa invaliditetom kao i druga pravna i fizička lica.
- (3) Strana pravna i fizička lica mogu osnovati privredno društvo za zapošljavanje lica sa invaliditetom u skladu sa ovim zakonom, propisima o privrednim društvima, stranim ulaganjima i o politici direktnih stranih ulaganja i drugim propisima.
- (4) Na rad i djelovanje, te postupak imenovanja i razrješenja organa upravljanja, rukovođenja i nadzora u privrednim društvima za zapošljavanje lica sa invaliditetom primjenjuju se važeći propisi o privrednim društvima i opći akti.

Član 25.  
(Zaštitna radionica)

- (1) Privredno društvo u skladu sa ovim zakonom može ostvariti status zaštitne radionice.
- (2) Status zaštitne radionice ostvaruje privredno društvo za zapošljavanje lica sa invaliditetom, koje kumulativno ispunjava sljedeće uslove:
  - a) da u odnosu na ukupan broj zaposlenih zapošljava minimalno 50% lica sa najmanje 60% invaliditeta, a najmanje deset takvih lica koji su zaposleni na puno radno vrijeme, plus
  - b) da u odnosu na ukupan broj zaposlenih zapošljava 20% lica sa 100% invaliditeta, a najmanje četiri takva lica koji su zaposleni na puno radno vrijeme, od kojih najmanje dva u skladu sa zakonom ostvaruju pravo na dodatak za njegu i pomoć od drugog lica, i
  - c) da prosjek stepena invaliditeta lica koja su zaposlena u zaštitnoj radionici nije manji od 75%.

**POGLAVLJE I. POSTUPAK UTVRĐIVANJA STATUSA PRIVREDNOG DRUŠTVA  
ZA ZAPOŠLJAVANJE LICA SA INVALIDITETOM I ZAŠTITNE RADIONICE**

Član 26.  
(Podnošenje zahtjeva)

Zahtjev za utvrđivanje statusa privrednog društva za zapošljavanje lica sa invaliditetom i zaštitne radionice dostavlja se Federalnom ministarstvu rada i socijalne politike (Federalno ministarstvo), sa naznakom za Komisiju za utvrđivanje statusa privrednog društva za zapošljavanje lica sa invaliditetom i zaštitne radionice.

Član 27.  
(Komisija za utvrđivanje statusa)

- (1) Federalni ministar osniva Komisiju za utvrđivanje statusa privrednog društva za zapošljavanje lica sa invaliditetom i zaštitne radionice (u daljem tekstu: Komisija za utvrđivanje statusa), koja utvrđuje ispunjenost uslova za početak rada privrednog društva za zapošljavanje lica sa invaliditetom i zaštitne radionice.
- (2) Komisija za utvrđivanje statusa iz stava (1) ovog člana ima pet članova od kojih je:
  - a) jedan član predstavnik organizacija lica sa invaliditetom,
  - b) jedan član predstavnik Fonda,
  - c) tri člana predstavnici federalnog ministarstva nadležnog za rad.
- (3) Sredstva za finansiranje rada Komisije osigurava Fond.
- (4) Prilikom izvršavanja nadležnosti iz stava (1) ovog člana, Komisija za utvrđivanje statusa dužna je sačiniti zapisnik koji se dostavlja federalnom ministarstvu nadležnom za rad, te podnosiocu zahtjeva, a u kojem se konstatuje da li su ispunjeni uslovi propisani ovim zakonom za utvrđivanje statusa privrednog društva za zapošljavanje lica sa invaliditetom, odnosno zaštitne radionice.
- (5) Ukoliko prilikom obavljanja svojih nadležnosti, Komisija za utvrđivanje statusa konstatuje da postoje određeni nedostaci u vezi sa ispunjavanjem uslova

propisanih ovim zakonom, odredit će rokove i mjere za otklanjanje tih nedostataka.

- (6) Prilikom obavljanja svojih nadležnosti Komisija je pored pregleda dostavljene dokumentacije dužna obaviti i neposredan pregled u sjedištu podnosioca zahtjeva, samo ukoliko se na osnovu dostavljene dokumentacije može utvrditi da su ispunjeni uslovi koji se odnose zastupljenost lica sa invaliditetom u ukupnom broju zaposlenika sa punim radnim vremenom na način propisan ovom zakonom.

#### Član 28.

(Priznavanje statusa privrednog društva za zapošljavanje lica sa invaliditetom i zaštitne radionice)

- (1) Rješenje o priznavanju statusa, odnosno rješenje o odbijanju zahtjeva za priznavanje statusa privrednog društva za zapošljavanje lica sa invaliditetom i zaštitne radionice donosi federalno ministarstvo nadležno za rad, na osnovu zapisnika Komisije za utvrđivanje statusa u kojem se konstatuje da li su ispunjeni uslovi propisani ovim zakonom za utvrđivanje statusa privrednog društva za zapošljavanje lica sa invaliditetom, odnosno zaštitne radionice.
- (2) Rješenje o priznavanju statusa iz stava (1) ovog člana ima dejstvo od dana donošenja tog rješenja.
- (3) Protiv rješenja iz stava (1) ovog člana žalba nije dopuštena, ali se može pokrenuti uprvani spor pred nadležnim sudom u roku od 30 dana.
- (4) Na postupak priznavanja statusa iz ovog člana, te postupak ukidanja statusa iz člana 31. ovog zakona, primjenjuje se Zakon o upravnom postupku („Službene novine Federacije BiH“, br. 2/98, 48/99 i 61/22).

## POGLAVLJE II. NADZOR NAD KONTINUITETOM U ISPUNJAVANJU USLOVA

#### Član 29.

(Kontinuitet u ispunjavanju uslova)

- (1) Privredno društvo za zapošljavanje lica sa invaliditetom dužno je kontinuirano bez prekida osiguravati zastupljenost lica sa invaliditetom u ukupnom broju zaposlenika sa punim radnim vremenom u srazmjeri iz člana 24. ovog zakona, te kontinuirano ispunjavati i druge uslove iz člana 24. ovog zakona.
- (2) Zaštitna radionica dužna je kontinuirano bez prekida osiguravati zastupljenost lica sa invaliditetom u ukupnom broju zaposlenika sa punim radnim vremenom u srazmjeri iz člana 25. ovog zakona, te kontinuirano ispunjavati i druge uslove iz člana 25. ovog zakona.

#### Član 30.

(Nadzor nad kontinuitetom u ispunjavanju uslova)

- (1) Nadzor nad kontinuitetom u ispunjavanju uslova iz člana 24, odnosno člana 25. ovog zakona vrši Fond.
- (2) Ukoliko prilikom vršenja nadzora iz stava (1) ovog člana, Fond utvrdi da su prestali postojati uslovi za zadržavanje statusa privrednog društva za zapošljavanje lica sa invaliditetom, odnosno zaštitne radionice, dužan je o

tome odmah obavijestiti federalno ministarstvo nadležno za rad, uz dostavljanje dokaza pribavljenih u postupku nadzora.

**Član 31.**  
(Ukidanje statusa)

- (1) Federalno ministarstvo nadležno za rad će na osnovu obavijesti Fonda i dokaza iz člana 30. ovog zakona, odlučiti o ukidanju statusa privrednog društva za zapošljavanje lica sa invaliditetom, odnosno zaštitne radionice.
- (2) Rješenje o ukidanju statusa iz stava (1) ovog člana ima dejstvo od dana donošenja tog rješenja.
- (3) Protiv rješenja iz stava (1) ovog člana žalba nije dopuštena, ali se može pokrenuti upravni spor pred nadležnim sudom u roku od 30 dana.

**DIO PETI – OLAKŠICE PRI ZAPOSŁJAVANJU LICA SA INVALIDITETOM**

**Član 32.**  
(Olakšice za zapošljavanje lica sa invaliditetom)

- (1) Poslodavac koji zapošljava lice sa invaliditetom, a koji ispunjava uslove iz člana 20, odnosno člana 21. ovog zakona, te pravni subjekti koji zapošljavaju lica sa invaliditetom pod posebnim uslovima, imaju pravo na:
  - a) poreske i carinske olakšice utvrđene poreskim i carinskim propisima,
  - b) stimulans predviđen ugovorom o zapošljavanju lica sa invaliditetom zaključenim sa Fondom, službom za zapošljavanje, Federalnim zavodom za penzijsko i invalidsko osiguranje, nadležnom službom socijalne zaštite, jedinicom lokalne uprave ili sa drugim poslodavcem (u daljnjem tekstu: nosilac osiguranja zapošljavanja).
- (2) Privredna društva za zapošljavanje lica sa invaliditetom i zaštitne radionice, te organizacije lica sa invaliditetom koje imaju zaposlena lica sa invaliditetom, pored prava iz stava (1) ovog člana, imaju pravo i na:
  - a) pogodnosti na osnovu statusa poslodavca,
  - b) novčanu nadoknadu.
- (3) Olakšice i druga prava iz ovog člana poslodavac ostvaruje, bez obzira na to da li je lice sa invaliditetom prethodno bilo prijavljeno na evidenciji nezaposlenih slube za zapošljavanje.

**Član 33.**  
(Olakšice za privredna društva za zapošljavanje lica sa invaliditetom i zaštitne radionice)

- (1) Privredno društvo za zapošljavanje lica sa invaliditetom i zaštitna radionica, oslobođeni su plaćanja:
  - a) poreza na specifične načine ostvarivanja prihoda kao što su lutrija, tombola ili druga vrsta nagradne igre i razne jednokratne dobrotvorne akcije neekonomske prirode,
  - b) poreza na svaki vid stavljanja privatne svojine u javnu svojinu u korist privrednog društva,

- c) poreza u slučaju sticanja prava svojine na nepokretnosti bez obzira na osnov sticanja (kupovina, poklon, legat, testament i dr),
  - d) poreza na dobit,
  - e) naknade za eksploataciju šuma,
  - f) članarine za turističke zajednice,
  - g) naknade za infrastrukturu (građevinsko zemljište, vodoprivreda, elektroprivreda, magistralni putevi i dr),
  - h) doprinosa za vodoprivredu,
  - i) poreza za zaštitu od prirodnih i drugih nepogoda,
  - j) doprinosa za ekološku zaštitu,
  - k) komunalnih, administrativnih i dr. vrsta taksi,
  - l) naknada i taksi prilikom registracije preduzeća i samostalnih djelatnosti.
- (2) Privredno društvo, ustanova, organizacija lica sa invaliditetom i zaštitna radionica plaćaju komunalne usluge, telefonske usluge i troškove električne energije, pod uslovima koji važe za domaćinstva.
- (3) Oslobođanja i benificije utvrđene ovim članom bliže se uređuju zakonima i drugim propisima, kojim se regulišu te oblasti.

#### Član 34.

(Obaveza ugovaranja poslova sa pravnim subjektima koji zapošljavaju lica sa invaliditetom pod posebnim uslovima)

- (1) Subjekti iz člana 18. stav (1) ovog zakona, osim privrednih društava čiji većinski vlasnik kapitala nije država, dužni su najmanje 35% od svojih potreba za proizvodima i uslugama koje proizvode i pružaju privredna društva za zapošljavanje lica sa invaliditetom, zaštitne radionice i samostalne djelatnosti u vlasništvu lica sa invaliditetom, zadovoljavati od ovih privrednih društava, zaštitnih radionica i samostalnih djelatnosti u vlasništvu lica sa invaliditetom, pod uslovima koji važe na tržištu.
- (2) Ugovorni organ obavezno primjenjuje preferencijalni tretman od 20% od ukupnih uslova tendera u skladu sa Zakonom o javnim nabavkama.
- (3) Obim poslova iz stava (1) ovog člana utvrđuje se na početku svake kalendarske godine ugovorom između subjekata iz stava (1) ovog člana i privrednih društava za zapošljavanje lica sa invaliditetom, zaštitnih radionica i samostalnih djelatnosti u vlasništvu lica sa invaliditetom.

#### Član 35.

(Pravo na novčanu nadoknadu)

- (1) Subjekti iz člana 32. stav (2) ovog zakona, imaju pravo na novčanu nadoknadu za zaposlena lica sa invaliditetom na osnovu:
- a) plaćenog doprinosa za penzijsko i invalidsko osiguranje,
  - b) plaćenog doprinosa za zdravstveno osiguranje,
  - c) plaćenog doprinosa za osiguranje od nezaposlenosti,
  - d) poreza na dohodak.
- (2) Organizacije lica sa invaliditetom koje imaju zaposlena lica sa invaliditetom imaju pravo na novčanu nadoknadu iz stava (1) ovog člana za najviše dva zaposlena lica sa invaliditetom sa najmanje 60% invaliditeta.
- (3) Privredni i drugi pravni subjekti iz člana 20. ovog zakona, ako zapošljavaju veći broj lica sa invaliditetom od utvrđene obaveze kao i privredni i drugi



pravni subjekti iz člana 21. ovog zakona, ako zapošljavaju lica sa invaliditetom, imaju pravo na novčanu nadoknadu iz stava (1) ovog člana za zaposlena lica sa invaliditetom sa 90% i 100% invaliditeta.

- (4) Isplata novčane nadoknade iz ovog člana predstavlja prioritet u podmirivanju obaveza Fonda.
- (5) Odredba st. (1), (2) i (3) ovoga člana ne odnosi se na poslodavce iz člana 19. stav (1) ovog zakona.
- (6) Pravo na novčanu nadoknadu iz stava (1) ovog člana neće ostvariti korisnik novčanog stimulansa za vrijeme ostvarivanja tog stimulansa.
- (7) Način i uslovi isplate novčane nadoknade iz stava (1) ovog člana i subvencije plaće iz člana 37. ovog zakona, definisat će se pravilnikom koji donosi Fond.

#### Član 36.

(Isplata novčane nadoknade)

- (1) Zahtjev za isplatu novčane nadoknade poslodavac podnosi Fondu. Uz zahtjev se prilaže obračun novčane nadoknade sa podacima o licima sa invaliditetom i dokazima o uplaćenim porezima i doprinosima na plaću za ta lica i ostale zaposlenike, primjerci obračuna plaće za lica sa invaliditetom, a za lica sa invaliditetom koje se prvi put zapošljava i dokazi o zapošljavanju i invaliditetu.
- (2) Poslodavac može zahtjev za isplatu novčane nadoknade podnijeti po isteku obračunskog mjeseca ili tromjesječna tekuće godine.
- (3) Novčana nadoknada isplaćuje se u roku od 30 dana od dana podnošenja zahtjeva.
- (4) Novčana nadoknada iz čl. 35. i 37. ovog zakona isplaćuje se na maksimalni iznos od tri prosječne neto plaće u Federaciji prema posljednje objavljenom statističkom podatku.

#### Član 37.

(Pravo na subvenciju plaće)

- (1) Privredno društvo za zapošljavanje lica sa invaliditetom koje ostvari status zaštitne radionice u skladu sa ovim zakonom ima pravo na novčanu nadoknadu iz ovog zakona za sve zaposlenike i pravo na subvenciju neto plaće zaposlenih lica sa invaliditetom u visini 35% od prosječne neto plaće u Federaciji, prema podacima Federalnog zavoda za statistiku.
- (2) Organizacije koje steknu status organizacija lica sa invaliditetom imaju pravo na subvenciju neto plaće iz stava (1) ovog člana za najviše dva zaposlena lica sa 90% i 100% invaliditeta.
- (3) Pravo na subvenciju plaće iz stava (1) ovog člana neće ostvariti korisnik novčanog stimulansa za vrijeme ostvarivanja tog stimulansa.

#### Član 38.

(Stimulansi za zapošljavanje lica sa invaliditetom)

- (1) Stimulansi koji se utvrđuju ugovorom o zapošljavanju lica sa invaliditetom zaključenim sa nosiocem osiguranja zapošljavanja iz člana 32. ovog Zakona su: jednokratna materijalna davanja, sredstva za prilagođavanje radnog mjesta i uslova rada kod poslodavca, sredstva namjenjena kupovini strojeva, opreme, alata, pribora potrebnog za odvijanje poslovnog procesa kod

poslodavca, sredstva za nabavku i adaptaciju poslovnog prostora i sredstva naknade razlike zbog smanjenog radnog učinka ili za sufinansiranje dijela plaće asistenta (pomagača u radu) lica sa invaliditetom u toku rada, a što će se detaljno urediti pravilnikom koji donosi Fond.

- (2) Prava iz ovog člana mogu ostvariti svi poslodavci koji zapošljavaju lica sa invaliditetom uključujući privredna društva za zapošljavanje lica sa invaliditetom i zaštitne radionice.

#### Član 39.

(Prava lica sa invaliditetom koji obavljaju samostalnu ili poljoprivrednu djelatnost)

- (1) Prava iz člana 32. ovog zakona, izuzev prava koja imaju zaštitne radionice, pripadaju i licima sa invaliditetom koja obavljaju samostalnu djelatnost ili poljoprivrednu djelatnost kao jedino i glavno zanimanje.
- (2) Prava iz stava (1) ovog člana pripadaju i roditelju, bračnom drugu ili djetetu koji sa tim licem zasnuje radni odnos u svojstvu zaposlenog i koji prema tom licu ispunjava obaveze poslodavca iz radnog odnosa.
- (3) Prava iz stava (1) ovog člana pripadaju i roditelju, bračnom drugu ili djeci lica sa invaliditetom koja su starija od 15 godina i mlađa od 65 godina, koja obavljaju poljoprivrednu djelatnost kao jedino i glavno zanimanje i koja za lica sa invaliditetom kao člana domaćinstva plaćaju obavezne doprinose za zdravstveno osiguranje i za penzijsko i invalidsko osiguranje.
- (4) Potvrdu o ispunjavanju uslova iz st. (2) i (3) ovog člana, na zahtjev lica iz stava (1) ovog člana izdaje općinski organ uprave nadležan za rad.

### **DIO ŠESTI – FOND ZA PROFESIONALNU REHABILITACIJU I ZAPOŠLJAVANJE OSOBA SA INVALIDITETOM**

#### Član 40.

(Nadležnosti Fonda)

- (1) Fond je javna ustanova čiji je osnivač Parlament Federacije Bosne i Hercegovine.
- (2) Fond obavlja sljedeće poslove:
  - a) provodi politiku razvoja i unapređivanja profesionalne rehabilitacije i zapošljavanja lica sa invaliditetom, osim poslova obrazovnih ustanova čija je osnovna djelatnost sticanje osnovnog i srednjeg obrazovanja,
  - b) vrši isplate novčanih nadoknada i stimulansa,
  - c) finansira i sufinansira programe razvoja privrednih društava za zapošljavanje lica sa invaliditetom i zaštitnih radionica,
  - d) finansira i sufinansira programe za održavanje zaposlenosti lica sa invaliditetom,
  - e) finansira i sufinansira programe kapitalnih ulaganja privrednih društava za zapošljavanje lica sa invaliditetom čiji su osnivači organizacije lica sa invaliditetom,
  - f) nadzire ostvarivanje prava na novčanu nadoknadu i stimulans i korištenjem drugih sredstava Fonda,
  - g) nadzire da li je pravilan obračun novčane nadoknade iz čl. 35. i 37. ovog Zakona i vjerodostojnost priloženih dokaza i drugih dokumenata,

- h) vrši dodjelu posebnih sredstava za inovativne programe i posebne programe zapošljavanja lica sa invaliditetom,
- i) vrši izbor i dodjeljuje nagradu za najboljeg poslodavca za zapošljavanje lica sa invaliditetom,
- j) druge poslove predviđene odlukom o osnivanju Fonda i Statutom Fonda.

Član 41.  
(Prihodi Fonda)

- (1) Prihode Fonda čine:
  - a) sredstva iz budžeta Federacije,
  - b) sredstva posebnog doprinosa iz čl. 20. i 21. ovog zakona,
  - c) sredstva Federalnog zavoda za zapošljavanje u iznosu od 10% od sredstava planiranih finansijskim planom Federalnog zavoda za zapošljavanje za aktivnu politiku zapošljavanja u tekućoj godini,
  - d) sredstva kantonalnih službi za zapošljavanje u iznosu od 5% od sredstava planiranih finansijskim planom kantonalnih službi za zapošljavanje za aktivnu politiku zapošljavanja u tekućoj godini,
  - e) drugi prihodi ostvareni na osnovu zakona i drugih propisa i donacije domaćih i stranih pravnih i fizičkih lica.
- (2) Ako sredstva Fonda prikupljena po osnovama iz stava (1) ovog člana nisu dovoljna za podmirenje obaveza nastalih u toku godine, i to obaveza za isplatu novčane nadoknade iz člana 35. ovog zakona i subvencije plaće iz člana 37. ovog zakona, u skladu sa ovim zakonom, nedostajuća sredstava osigurati će se iz Budžeta Federacije.

Član 42.  
(Organi Fonda)

- (1) Fond ima organ rukovođenja, organ upravljanja i organ nadzora.
- (2) Organi iz čl. 43, 44. i 45. ovog zakona imaju nadležnosti i ovlaštenja utvrđena ovim zakonom, drugim propisima i općim aktom Fonda.
- (3) Direktora Fonda imenuje Upravni odbor Fonda uz prethodno pribavljenu saglasnost Vlade Federacije na osnovu javnog konkursa objavljenog u "Službenim novinama Federacije BiH" i sredstvima javnog informisanja, dok Upravni i Nadzorni odbor Fonda imenuje Vlada Federacije, na osnovu javnog konkursa, u skladu sa Zakonom o vladinim, ministarskim i drugim imenovanjima („Službene novine Federacije BiH“, br. 12/03, 34/03 i 65/13).

Član 43.  
(Direktor Fonda)

- (1) Organ rukovođenja je direktor Fonda.
- (2) Za direktora Fonda može biti imenovano lice koje, pored opštih uslova propisanih Zakonom o vladinim, ministarskim i drugim imenovanjima, ispunjava i sljedeće posebne uslove:

- a) VSS – VII stepen stručne spreme, odnosno visoko obrazovanje prvog ciklusa (koji se vrednuje sa 240 ECTS bodova) ili drugog ili trećeg ciklusa Bolonjskog sistema studiranja, završen pravni, ekonomski ili drugi fakultet društvenog smjera,
  - b) da ima najmanje pet godina radnog staža na poslovima rukovođenja,
  - c) da ima izražene organizacijske sposobnosti i sklonost za timski rad.
- (3) U postupku imenovanja direktora Fonda prednost ima lice sa invaliditetom pod jednakim uslovima, odnosno ukoliko u konkursnoj proceduri ostvare isti broj bodova.

#### Član 44. (Upravni odbor Fonda)

- (1) Organ upravljanja u Fondu je upravni odbor.
- (2) Upravni odbor Fonda broji sedam članova od kojih je jedan član predstavnik reprezentativnog udruženja poslodavaca za teritoriju Federacije, jedan član predstavnik organizacija lica sa invaliditetom, koje su osnivači ili vlasnici ustanova i privrednih društava za profesionalnu rehabilitaciju i zapošljavanje lica sa invaliditetom i jedan član predstavnik organizacija lica sa invaliditetom.
- (3) Za člana Upravnog odbora Fonda može biti imenovano lice koje, pored opštih uslova propisanih Zakonom o vladinim, ministarskim i drugim imenovanjima, ispunjava i sljedeće posebne uslove:
  - a) VSS – VII stepen stručne spreme, odnosno visoko obrazovanje prvog ciklusa (koji se vrednuje sa 240 ECTS bodova) ili drugog ili trećeg ciklusa Bolonjskog sistema studiranja,
  - b) da ima najmanje pet godina radnog staža u struci po sticanju diplome visokog obrazovanja.

#### Član 45. (Nadzorni odbor Fonda)

- (1) Organ kontrole poslovanja u Fondu je nadzorni odbor koji broji pet članova, od kojih je najmanje jedan predstavnik organizacija lica sa invaliditetom.
- (2) Za člana Nadzornog odbora Fonda može biti imenovano lice koje, pored općih uslova propisanih Zakonom o vladinim, ministarskim i drugim imenovanjima, ispunjava i sljedeće posebne uslove:
  - a) VSS – VII stepen stručne spreme, odnosno visoko obrazovanje prvog ciklusa (koji se vrednuje sa 240 ECTS bodova) ili drugog ili trećeg ciklusa Bolonjskog sistema studiranja pravne ili ekonomske struke,
  - b) da ima najmanje pet godina radnog staža u struci po sticanju diplome visokog obrazovanja.

#### Član 46. (Postupanje Fonda kod isplate korisnicima sredstava)

- (1) Fond je ovlašten pozvati korisnika sredstava Fonda da u roku koji ne može biti kraći od tri radna dana ni duži od osam radnih dana, otkloni greške u obračunu novčanog stimulansa te da, uz zahtjev za odobrenje sredstava Fonda po drugom osnovu priloži posebne dokaze.

- (2) Korisnik sredstava Fonda dužan je Fondu nadoknaditi štetu ako je:
  - a) sredstva Fonda ostvario na osnovu neistinitih ili netačnih podataka ili na drugi protivpravni način, odnosno u većem obimu nego što mu pripadaju,
  - b) sredstva Fonda koristio suprotno namjeni zbog koje su mu odobrena.
- (3) Korisnik sredstava Fonda dužan je Fondu vratiti sredstva stečena bez zakonske osnove.
- (4) Pravilnikom Fonda će se urediti bliži uslovi za vršenje isplate sredstava od strane Fonda prema svim korisnicima.

## **DIO SEDMI – NADZOR I KAZNE NE ODREDBE**

### **Član 47.**

(Nadzor nad korištenjem sredstava Fonda)

- (1) Nadzor nad korištenjem sredstava Fonda vrši Federalno ministarstvo finansija prema svojim nadležnostima i u skladu sa zakonom.
- (2) Radi ispunjavanja obaveza iz ovog zakona Fond, Porezna uprava Federacije BiH i poslodavci će se povezati kroz informacijski sistem, što će se urediti podzakonskim aktom kojeg donosi federalni ministar u saradnji sa Fondom i Poreznom upravom Federacije.
- (3) Vlasnik informacijskog sistema iz stava (2) ovog člana bit će Fond.

### **Član 48.**

(Nadzor nad zakonitošću rada)

- (1) Nadzor nad zakonitošću rada i zakonitošću općih akata Fonda vrši federalno ministarstvo nadležno za rad.
- (2) Nadzor nad stručnim radom ustanova za profesionalnu rehabilitaciju kojima je osnivač Federacija vrši federalno ministarstvo nadležno za rad, dok kantonalna ministarstva nadležna za poslove rada i socijalne politike vrše nadzor nad stručnim radom ostalih ustanova za profesionalnu rehabilitaciju prema sjedištu, bez obzira ko je osnivač.
- (3) Sadržaj i način provođenja nadzora iz st. 1. i 2. ovog člana propisuju ministri nadležni za rad i socijalnu politiku.

### **Član 49.**

(Inspekcijski nadzor)

Poslove inspekcijskog nadzora nad provođenjem ovog Zakona obavljaju Porezna uprava Federacije BiH i nadležne inspekcije rada, svako u okviru svoje nadležnosti.

### **Član 50.**

(Vrste i visine prekršaja)

- (1) Novčanom kaznom u iznosu od 5.000,00 KM do 15.000,00 KM bit će kažnjen za prekršaj poslodavac koji:
  - a) ne uplati poseban doprinos za zapošljavanje lica sa invaliditetom (član 20. stav (2) i član 21. stav (2) ovog zakona),

- b) prema licu sa invaliditetom postupi suprotno odredbi člana 19. ovog zakona.
- (2) Za izricanje kazne iz stava (1) tačka a) ovog člana nadležna je Porezna uprava Federacije BiH, a za izricanje kazne iz stava (1) tačka b) ovog člana nadležna je inspekcija rada.
  - (3) Novčanom kaznom u iznosu od 1.000,00 KM do 3.000,00 KM za prekršaj iz stava (1) ovog člana bit će kažnjeno i odgovorno lice kod poslodavca, a kaznu izriče nadležni organ iz stava (2) ovog člana.
  - (4) Novčanom kaznom od 5.000,00 KM do 15.000,00 KM bit će kažnjeno za prekršaj privredno društvo za zapošljavanje lica sa invaliditetom koje:
    - a) fiktivno zaključi ugovor o radu sa licem sa invaliditetom, na način da to lice uopće ne obavlja poslove iz zaključenog ugovora o radu,
    - b) bez prethodne saglasnosti Fonda otuđi ili na drugi način raspoláže sredstvima i opremom nabavljenom od sredstava Fonda,
    - c) postupa suprotno ugovoru zaključenim sa Fondom radi realizacije finansiranja i sufinansiranja programa iz člana 40. ovog zakona.
  - (5) Za izricanje kazne iz stava (4) tačka a) ovog člana nadležna je inspekcija rada, a za izricanje kazne iz stava (4) tač. b) i c) ovog člana nadležna je Porezna uprava Federacije BiH.
  - (6) Novčanom kaznom u iznosu od 3.000,00 KM do 15.000,00 KM za prekršaj iz stava (4) ovog člana bit će kažnjeno i odgovorno lice kod poslodavca.
  - (7) Novčanom kaznom od 1.000,00 KM do 5.000,00 KM bit će kažnjeno lice sa invaliditetom koje sa privrednim društvom za zapošljavanje lica sa invaliditetom zaključi fiktivni ugovor o radu, na način da uopće ne obavlja poslove iz zaključenog ugovora o radu, a da o tome ne obavijesti Fond u pisanom obliku.
  - (8) Nadležni organi iz stava (5) ovog člana za prekršaje iz stava (4) ovog člana postupaju po prijavi Fonda, koji je dužan nadležnom organu uz prijavu dostaviti dokaze pribavljene u postupku nadzora iz čl. 30. i 40. ovog zakona.

## **DIO OSMI – PRELAZNE I ZAVRŠNE ODREDBE**

### **Član 51.**

(Uslovi za zadržavanje statusa privrednih društava za zapošljavanje lica sa invaliditetom i zaštitnih radionica)

- (1) Privredna društva koja u momentu stupanja na snagu ovog zakona budu imala status privrednog društva za zapošljavanje lica sa invaliditetom, odnosno status zaštitne radionice, dužna su da u roku od godinu dana od dana stupanja na snagu ovoga zakona federalnom ministarstvu nadležnom za rad dostave dokumentaciju kojom će dokazati da ispunjavaju uslove iz člana 24. odnosno člana 25. ovog zakona.
- (2) Privrednim društvima koja u roku iz stava (1) ovog člana ne dostave dokumentaciju, status privrednog društva za zapošljavanje lica sa invaliditetom, odnosno status zaštitne radionice prestaje po sili zakona, istekom roka iz stava (1) ovog člana.

#### Član 52.

(Donošenje i usklađivanje podzakonskih akata)

Podzakonski akti iz člana 10. stav (4), člana 11. stav (3), člana 17, člana 18. stav (3), člana 47. stav (3) ovog zakona, donijet će se, odnosno uskladiti sa ovim zakonom u roku od šest mjeseci od dana stupanja na snagu ovog zakona, dok će se podzakonski akt iz člana 48. stav (2) ovog zakona donijeti u roku od godinu dana od dana stupanja na snagu ovog zakona.

#### Član 53.

(Usklađivanje općih akata Fonda)

Fond je dužan svoje opće akte, uključujući i akte koji se odnose na isplatu novčanih nadoknada i stimulansa, te finansiranja i sufinansiranja programa iz člana 40. ovog Zakona uskladiti sa ovim zakonom u roku od šest mjeseci od dana stupanja na snagu ovog zakona.

#### Član 54.

(Prestanak važenja propisa)

Danom stupanja na snagu ovog zakona prestaje da važi Zakon o profesionalnoj rehabilitaciji, osposobljavanju i zapošljavanju osoba sa invaliditetom („Službene novine Federacije BiH“, broj 9/10).

#### Član 55.

(Stupanje na snagu)

Ovaj zakon stupa na snagu osmog dana od dana objavljivanja u „Službenim novinama Federacije BiH“.

# **O B R A Z L O Ž E N J E**

## **NACRTA ZAKONA O PROFESIONALNOJ REHABILITACIJI I ZAPOŠLJAVANJU LICA SA INVALIDITETOM**

### **I – USTAVNI OSNOV**

Ustavni osnov za donošenje ovog zakona sadržan je u odredbama člana IV.A.20.(1)d), a u vezi sa članom III.2.e) i članom II.A.2.1) Ustava Federacije Bosne i Hercegovine.

Prema odredbama člana IV.A.20.(1)d) Ustava Federacije Bosne i Hercegovine, Parlament Federacije BiH nadležan je za donošenje zakona o vršenju funkcija federalne vlasti, a prema odredbama člana III.2.e) federalna vlast i kantoni nadležni su za socijalnu politiku.

### **II – RAZLOZI ZA DONOŠENJE ZAKONA**

Zakon o profesionalnoj rehabilitaciji i zapošljavanju osoba sa invaliditetom („Službene novine Federacije BiH“, broj 9/10), koji je trenutno u primjeni, donesen je 2010. godine. Donošenje navedenog zakona u to vrijeme predstavljalo je novinu kada je u pitanju uređivanje oblasti profesionalne rehabilitacije i zapošljavanja lica sa invaliditetom, ali je njegova trinaestogodišnja primjena pokazala da postoji prostor za dodatno unaprjeđivanje ove oblasti, odnosno da postoji potreba da određenim izmjenama i dopunama na osnovu kojih bi se postigla primjena navedenog zakona u njegovom punom kapacitetu. Naime, ključni problem u implementaciji navedenog zakona ogleda se u odsustvu odredbi koji se odnose na kontrolu uplate posebnog doprinosa za zapošljavanje lica sa invaliditetom, u slučaju onih poslodavaca koji ne zapošljavaju takva lica.

S tim u vezi, Programom rada Vlade Federacije Bosne i Hercegovine za 2023. godinu, odnosno Planom rada Federalnog ministarstva rada i socijalne politike za 2023. godinu predviđena je izrada Zakona o izmjenama i dopunama Zakona o profesionalnoj rehabilitaciji i zapošljavanju osoba sa invaliditetom.

S obzirom da izrada navedenog zakona zahtijeva učešće svih uključenih aktera, Federalno ministarstvo rada i socijalne politike je u skladu sa svojim nadležnostima imenovalo Radnu grupu za izradu teksta Zakona o izmjenama i dopunama navedenog Zakona, koju su činili predstavnici navedenog ministarstva, Fonda za profesionalnu rehabilitaciju i zapošljavanje osoba sa invaliditetom, predstavnici organizacija lica sa invaliditetom (Savez ratnih vojnih invalida Federacije BiH, Savez slijepih Herceg-Bosne, Vijeće organizacija osoba sa invaliditetom Federacije BiH, Udruženje slijepih Kantona Sarajevo, Informativni centar za osobe sa invaliditetom LOTOS Tuzla, Udruženje paraplegičara i oboljelih od dječije paralize Zeničko-dobojskog kantona), predstavnici Udruženja poslodavaca u Federaciji BiH, te predstavnici akademske zajednice ispred Ekonomskog fakulteta Univerziteta u Sarajevu i Ekonomskog fakulteta Sveučilišta u Mostaru. Također, pomoć u radu Radne grupe pružali su predstavnici organizacije „People in need“ i Saveza



„Sumero“. Zadatak Radne grupe je da bio da izradi Nacrt zakona o izmjenama i dopunama Zakona o profesionalnoj rehabilitaciji, osposobljavanju i zapošljavanju lica sa invaliditetom, te isti dostavi Federalnom ministarstvu rada i socijalne politike. Rješenjem je određeno da izmjenama i dopunama navedenog zakona trebaju biti obuhvaćena pitanja koja se odnose na:

- uslove zapošljavanja lica sa invaliditetom s ciljem stimuliranja zapošljavanja osoba sa invaliditetom pod općim uslovima,
- pitanja koja se odnose na uslove i postupak za priznavanje statusa privrednih društava za zapošljavanje lica sa invaliditetom i zaštitnih radionica,
- kontrolu naplate posebnog doprinosa za zapošljavanje lica sa invaliditetom,
- uslove za izbor i imenovanje direktora, upravnog i nadzornog odbora Fonda za profesionalnu rehabilitaciju i zapošljavanje lica sa invaliditetom,
- nadzor nad zakonitošću rada Fonda za profesionalnu rehabilitaciju i zapošljavanje lica sa invaliditetom,
- te druga pitanja od značaja sa poboljšanje uslova za profesionalnu rehabilitaciju, osposobljavanje i zapošljavanje lica sa invaliditetom.

Na osnovu navedenog, Radna grupa je u skladu sa zadatim ciljevima sačinila Nacrt Zakona o izmjenama i dopunama Zakona o profesionalnoj rehabilitaciji i zapošljavanju osoba sa invaliditetom, koji je dostavljen Federalnom ministarstvu rada i socijalne politke kao obrađivaču ovog zakona, radi daljeg postupanja.

Imajući u vidu da je dostavljeni materijal Radne grupe sadržavao prijedloge za izmjene i dopune više od 40 odredaba navedenog Zakona, što predstavlja više od 50% teksta, pristupilo se izradi novog zakona čijim bi stupanjem na snagu bio stavljen van snage Zakon koji je donesen 2010. godine.

Naime, ovim zakonom stvaraju se uslovi za povećanje zaposlenosti lica sa invaliditetom pod općim uslovima i njihovo ravnopravno učešće na tržištu rada, uz otklanjanje barijera i stvaranje jednakih mogućnosti.

### **III – USKLAĐENOST SA PROPISIMA EUROPSKE UNIJE**

Prednacrt Zakona o profesionalnoj rehabilitaciji i zapošljavanju lica usklađen je sa Direktivom Vijeća 2000/78/EZ od 27. novembra 2000. godine o uspostavi općeg okvira za jednako postupanje pri zapošljavanju i obavljanju zanimanja, u dijelu koji se odnosi na zapošljavanje lica sa invaliditetom. Naime, navedenom Direktivom uređen je opći okvir za borbu protiv diskriminacije na osnovu vjere ili uvjerenja, invaliditeta, starosne dobi ili seksualnog usmjerenja koja se odnosi na zapošljavanje i odabir zvanja, kako bi se u državama uspostavilo načelo jednakog tretmana. S tim u vezi, a imajući u vidu predmet ovog Zakona, izvršeno je usklađivanje sa navedenom Direktivom u dijelu koji se odnosi na zapošljavanje lica sa invaliditetom.

### **IV – OBRAZLOŽENJE PREDLOŽENIH PRAVNIH RJEŠENJA**

#### **Osnovne odredbe (čl. 1-6)**

**Članom 1.** utvrđen je predmet ovog zakona, na način da se istim uređuje profesionalna rehabilitacija, osposobljavanje i zapošljavanje lica sa invaliditetom,

osnivanje i djelatnost ustanova, privrednih društava i drugih pravnih lica koja se bave profesionalnom rehabilitacijom i zapošljavanjem lica sa invaliditetom, rad Fonda za profesionalnu rehabilitaciju i zapošljavanje lica sa invaliditetom, način kontrole uplate posebnog doprinosa za zapošljavanje lica sa invaliditetom i druga pitanja u vezi sa profesionalnom rehabilitacijom, osposobljavanjem i zapošljavanjem lica sa invaliditetom. Dakle, za razliku od postojećeg zakona, ovim zakonom se uređuje i pitanje kontrole uplate posebnog doprinosa za zapošljavanje lica sa invaliditetom, što je ključno za implementaciju ovog zakona.

**Članom 2.** je u skladu sa Uredbom o postupku usklađivanja zakonodavstva Federacije Bosne i Hercegovine s pravnom tečevinom Europske unije ("Službene novine Federacije BiH, broj: 98/16), izvršeno preuzimanje Direktive Vijeća 2000/78/EZ od 27. novembra 2000. godine o uspostavi općeg okvira za jednako postupanje pri zapošljavanju i obavljanju zanimanja, kao pravnog akta Europske unije s kojim je izvršeno usklađivanje ovog zakona u dijelu koji se odnosi na zapošljavanje lica sa invaliditetom.

**Članom 3.** definisani su ključni pojmovi koji se koriste u ovom zakonu, a koji se odnose na pojam lica sa invaliditetom, poslodavca, profesionalne rehabilitacije, posebnog doprinosa za zapošljavanje lica sa invaliditetom, privrednog društva za zapošljavanje lica sa invaliditetom i zaštitne radionice.

**Članom 4.** definisano je ko su korisnici prava na zapošljavanje, profesionalnu rehabilitaciju i osposobljavanje u skladu sa ovim zakonom, na način da je predviđeno da su to lica čiji invaliditet u odnosu na sposobnosti lica bez invaliditeta, jednake ili slične životne dobi, jednakog ili sličnog obrazovanja, u jednakim ili sličnim uslovima rada, na jednakim ili sličnim poslovima ima za posljedicu trajno smanjenu mogućnost radnog osposobljavanja i zapošljavanja na tržištu rada pod općim uslovima, te očuvanje posla i napredovanje u poslu. Također, predviđeno je da su to i lica sa promijenjenom radnom sposobnošću prema propisima o penzijskom i invalidskom osiguranju, te učenik sa teškoćama u razvoju i učenik sa većim teškoćama u razvoju prema propisima o srednjem obrazovanju.

**Članom 5.** predviđeno je da je Institut za medicinsko vještačenje zdravstvenog stanja nadležni organ za utvrđivanje invaliditeta, smanjene i preostale radnu sposobnosti lica sa invaliditetom iz ovog zakona. Dakle, u skladu sa ovim zakonom, Institut za medicinsko vještačenje zdravstvenog stanja, pored invaliditeta i smanjene radne sposobnosti, kod lica sa invaliditetom utvrđuje i njihovu preostalu radnu sposobnost što je od ključnog značaja kod zapošljavanja ove kategorije lica. Propisano je da se postupak utvrđivanja invaliditeta, smanjene i preostale radne sposobnosti pokreće se na zahtjev lica sa invaliditetom ili nadležnog doktora medicine primarne zdravstvene zaštite. Inicijativu za podnošenje zahtjeva za pokretanje tog postupka mogu dati: nadležni doktor medicine u primarnoj zdravstvenoj zaštiti, roditelj, socijalni radnik, defektolog, psiholog i poslodavac.

**Članom 6.** predviđene su aktivnosti na osnovu kojih lica sa invaliditetom doprinosi svojoj profesionalnoj rehabilitaciji i zapošljavanju. S tim u vezi, predviđene su aktivnosti u vidu: školovanja i stručnog osposobljavanja, zavisno od svojih mogućnosti, sklonosti i sposobnosti, prijavljivanja na oglase o zapošljavanju na poslove za koje ispunjava predviđene uslove i koje je u stanju obavljati i

prihvatanjem ponuđenog zaposlenja na takvim poslovima, prihvatanja uslova u toku stručnog osposobljavanja i rada, saradnje po pitanjima stručnog osposobljavanja sa ljekarom, defektologom, psihologom, socijalnim radnikom, dipl. pravnikom, tehnologom i dr. stručnim licima, prihvatanja ponude za promjenu radnog mjesta, odnosno rasporeda na druge odgovarajuće poslove zbog prestanka potrebe ili nemogućnosti obavljanja dosadašnjih poslova, te stručnog osposobljavanjem tokom rada, po potrebi i dokvalifikacijom i prekvalifikacijom radi zadržavanja zaposlenja.

### **Profesionalna rehabilitacija i osposobljavanje lica sa invaliditetom (čl. 7-11)**

**Članom 7.** propisana je svrha profesionalne rehabilitacije na način da je predviđeno da lica sa invaliditetom ima pravo na profesionalnu rehabilitaciju s ciljem osposobljavanja tog lica za odgovarajući posao, njegovog zapošljavanja, te zadržavanja, odnosno napredovanja u tom poslu i profesionalnog razvijanja.

**Članom 8.** predviđene su mjere i aktivnosti koje obuhvata profesionalna rehabilitacija, a koje se izvode s ciljem osposobljavanja lica sa invaliditetom za odgovarajući posao, da se zaposli, posao zadrži i u njemu napreduje ili promijeni zanimanje.

**Član 9.** se odnosi na postupak priznavanja prava na profesionalnu rehabilitaciju kada su u pitanju lica sa invaliditetom. Naime, o priznavanju prava na profesionalnu rehabilitaciju na zahtjev lica sa invaliditetom odlučuje kantonalna služba za zapošljavanje nadležna prema prebivalištu lica sa invaliditetom. Uz zahtjev se prilaže dokaz o utvrđenom invaliditetu, odnosno smanjenoj i preostaloj radnoj sposobnosti.

**Članom 10.** definisani su pravni subjekti za izvođenje profesionalne rehabilitacije. Za razliku od postojećeg zakona, ovim zakonom je proširen krug pravnih subjekata, na način da je predviđeno da profesionalnu rehabilitaciju organizira i izvodi ustanova za profesionalnu rehabilitaciju, srednja škola, posebna škola, privredno društvo za zapošljavanje lica sa invaliditetom ili drugo pravno lice koje ispunjava uslove za profesionalnu rehabilitaciju u skladu sa ovim zakonom, po općim, prilagođenim ili posebnim programima. S obzirom da profesionalna rehabilitacija lica sa invaliditetom istovremeno predstavlja i dio procesa obrazovanja odraslih, a imajući u vidu nadležnost organa iz oblasti obrazovanja, ovim zakonom je predviđeno da će se podzakonskim aktom, u roku od šest mjeseci, propisati bliži uslovi, način finansiranja i opća načela u vezi sa provođenjem mjera i aktivnosti profesionalne rehabilitacije.

**Članom 11.** uređeno je osnivanje i djelovanje ustanove za profesionalnu rehabilitaciju lica sa invaliditetom, kao jednog od pravnih subjekata koji u skladu sa ovim zakonom izvode mjere i aktivnosti profesionalne rehabilitacije.

### **Zapošljavanje lica sa invaliditetom (čl. 12-23)**

**Članom 12.** propisano je da pravo na zapošljavanje, u smislu ovog zakona, ima lica sa invaliditetom kod kojeg je utvrđena smanjena, odnosno preostala radna sposobnost.

**Članom 13.** predviđeno je da se lica sa invaliditetom u skladu sa ovim zakonom zapošljavaju i rade na tržištu rada pod općim i posebnim uslovima.

**Čl. 14. i 15.** propisano je da lice sa invaliditetom zasniva radni odnos i ostvaruje svoja prava i obaveze u skladu sa propisima o radu, drugim propisima, kolektivnim ugovorom i pravilnikom o radu, te je u tom smislu predviđena i mogućnost rada od kuće, na način da je propisano da lica sa invaliditetom koja se zapošljavaju i rade na tržištu rada pod općim i posebnim uslovima, mogu poslove iz ugovora o radu obavljati i izvan prostorija poslodavca (kod kuće radnika ili u drugom prostoru koji osigura radnik), na način propisan Zakonom o radu.

**Čl. 16. i 17.** uređeno je pitanje vođenja evidencija o zaposlenim i nezaposlenim licima sa invaliditetom. Naime, predviđeno je da evidenciju o nezaposlenim licima sa invaliditetom vodi nadležna služba za zapošljavanje u skladu sa propisima o evidencijama u oblasti zapošljavanja u Federaciji BiH. Ovo iz razloga što Pravilnikom e evidencijama u oblasti zapošljavanja („Službene novine Federacije BiH“, br. 74/18 i 90/20), već predviđeno da se u odgovarajućim evidencijama o nezaposlenim osobama vode i podaci koji se odnose na invaliditet nezaposlene osobe (status invaliditeta, vrsta oštećenja, stepen invaliditeta, zanimanje za koje je osoba sa invaliditetom osposobljena rehabilitacijom). Također, istim pravilnikom je predviđeno da u slučaju kada poslodavci nadležnoj službi za zapošljavanje prijavljuju slobodno radno mjestu, u odgovarajućem obrascu popunjavaju i podatak koji se odnosi na mogućnost zapošljavanja lica sa invaliditetom na tom radnom mjestu. Kada je u pitanju vođenje evidencije o zaposlenim licima sa invaliditetom, predviđeno je da će federalni ministar nadležan za rad u roku od šest mjeseci donijeti pravilnik kojim će propisati način vođenja evidencije o zaposlenim licima sa invaliditetom, sadržaj evidencije, organe nadležne za vođenje te evidencije, obaveze poslodavaca, te druga pitanja od značaja za vođenje evidencije o zaposlenim licima sa invaliditetom.

**Članom 18.** uređeno je pitanje zapošljavanja lica sa invaliditetom pod općim uslovima. Naime, lica sa invaliditetom se zapošljavaju pod općim uslovima na otvorenom tržištu rada kod svih pravih subjekata koja nisu osnovana za zapošljavanje lica sa invaliditetom, već svih lica na otvorenom tržištu rada. Pod navedenim se podrazumijevaju državni organi, organi pravosuđa, organi lokalne uprave, javne službe, ustanove, fondovi, javna preduzeća, privredna društva i druga pravna lica.

**Član 19.** propisuje obavezu davanja prednosti pri zapošljavanju licu sa invaliditetom u slučaju zapošljavanja kod poslodavaca iz javnog sektora, što podrazumijeva državne organe, organe pravosuđa, organe lokalne uprave, javne službe, javne ustanove, fondove, javna preduzeća, privredna društva sa većinskim državnim kapitalom, odnosno sve poslodavce kod kojih postoje osnivačka ili vlasnička prava Federacije BiH, kantona, grada ili općine. Prednost pri zapošljavanju kod navedenih poslodavaca lica sa invaliditetom ostvaruju pod jednakim uslovima, odnosno ukoliko u okviru procedure za prijem u radni odnos ostvare isti broj bodova kao drugo lice kod kojeg nije utvrđen invaliditet. Da bi ostvarilo pravo na prednost pri zapošljavanju, lice sa invaliditetom dužno je uz prijavu na konkurs za prijem u radni odnos, pozvati se na to pravo, te pored dokaza predviđenih konkursom, priložiti i dokaz o utvrđenom statusu lica sa invaliditetom u smislu ovog zakona.

**Članom 20.** propisana je obaveza zapošljavanja lica sa invaliditetom pod općim uslovima. Naime, pomenuta obaveza propisana je u odnosu na poslodavce koji imaju najmanje 17 zaposlenih, na način da je poslodavac koji ima najmanje 17

zaposlenih, dužan da na tih 17 radnika ima zaposleno najmanje jedno lice sa invaliditetom. Predviđeno je pomjeranje navedene granice na godišnjem nivou za po jednog zaposlenog, na način da će se četvrte godine po stupanju na snagu ovog zakona i dalje ta obaveza odnositi na poslodavce koji imaju najmanje 20 zaposlenih. Naime, prema postojećem zakonu trenutno se ova obaveza odnosi na poslodavce koji imaju najmanje 16 zaposlenih, te predloženim zakonskim rješenjem uvažen zahtjev Udruženja poslodavaca u Federaciji BiH u vidu povećanja navedene granice. U smislu navedenog, uvažen je i zahtjev Udruženja poslodavaca u Federaciji BiH, da se navedena obaveza ne odnosi na novoosnovane poslodavce za period do 12 mjeseci poslovanja, kako bi se u prvih godinu dana olakšalo njihovo poslovanje na tržištu. Za one poslodavce koji ne budu ispunjavali utvrđenu obavezu, predviđeno je da su dužni mjesečno, pri isplati plaća, obračunati i uplatiti u Fond poseban doprinos za zapošljavanje lica sa invaliditetom u novčanom iznosu u visini 25% prosječne neto plaće u Federaciji prema posljednjem objavljenom podatku Federalnog zavoda za statistiku, i to za svako lice s invaliditetom koje su bili dužni zaposliti u skladu sa ovim zakonom. Naime, radi podsticanja zapošljavanja lica sa invaliditetom na otvorenom tržištu rada predviđena je navedena obaveza zapošljavanja jednog lica sa invaliditetom na svakih 17 zaposlenih kod poslodavca. Oni poslodavci koji ne budu ispunjavali propisanu obavezu bit će dužni da u Fond za profesionalnu rehabilitaciju i zapošljavanje osoba sa invaliditetom uplaćuju poseban doprinos u propisanom iznosu. Dakle, poseban doprinos za zapošljavanje lica sa invaliditetom je novčani iznos koji su poslodavci dužni obračunavati i uplaćivati Fondu, ukoliko ne zapošljavaju lica sa invaliditetom na način propisan ovim zakonom. Da bi se podstaklo zapošljavanje lica sa invaliditetom sa većim stepenom invaliditeta na otvorenom tržištu rada, ovim zakonom je predviđeno da ako poslodavac zapošljava lice sa invaliditetom od najmanje 90% invaliditeta, u pogledu obaveze zapošljavanja lica sa invaliditetom propisane ovim zakonom, smatrat će se kao da je zaposlio dva lica sa invaliditetom. Npr. poslodavac koji ima ukupno 36 zaposlenih imao bi obavezu da na ukupan broj zaposlenih ima zaposlena dva lica sa invaliditetom. Međutim, ukoliko bi poslodavaca iz ovog primjera imao zaposlenu jednu osobu sa invaliditetom sa 90% ili 100% invaliditeta smatralo bi se da je ispunio svoju obavezu, jer bi se u tom slučaju osoba sa većim stepenom invaliditeta od najmanje 90% invaliditeta računala kao dvije zaposlene osobe sa invaliditetom. U pogledu obaveza iz člana 20. ovog zakona, propisano je da kontrolu obračuna i uplate posebnog doprinosa za zapošljavanje lica sa invaliditetom vrši Porezna uprava Federacije BiH. Radi se o pitanju koje uopće nije bilo regulisano postojećim zakonom, te isto predstavlja jednu os osnovnih novina, s obzirom da će se na ovaj način riješiti pitanje naplate posebnog doprinosa od strane onih poslodavaca koji ne zapošljavaju lica sa invaliditetom, što će doprinijeti ili povećanju broja zaposlenih lica sa invaliditetom na otvorenom tržištu ili će dovesti do povećanja sredstava u budžetu Fonda, a koja su namijenjena za novčane nadoknade u vidu povrata doprinosa, stimulanse za zapošljavanje lica sa invaliditetom, subvencije plaće za lica sa invaliditetom, te finansiranje programa za održavanje zaposlenosti lica sa invaliditetom i programa za razvoj privrednih društava za zapošljavanje lica sa invaliditetom i zaštitnih radionica.

**Članom 21.** predviđene su obaveze poslodavaca sa manjim brojem zaposlenih kada je u pitanju zapošljavanje lica sa invaliditetom. Predviđeno je da poslodavci koji ne podliježu obavezi zapošljavanja lica sa invaliditetom iz člana 20. ovog zakona, mogu zapošljavati ta lica na odgovarajuće poslove u skladu sa ovim zakonom i po tom osnovu ostvariti određene stimulanse i povlastice u skladu sa zakonom. Navedeni

poslodavci dužni su svakog mjeseca prilikom isplate plaća uplaćivati u Fond poseban doprinos za zapošljavanje lica sa invaliditetom u visini 0,5% od iznosa isplaćene mjesečne bruto plaće svih zaposlenih, izuzev ako zapošljavaju lica sa invaliditetom.

**Čl. 22. i 23.** odnosi se na zapošljavanje pod posebnim uslovima. Naime, lica sa invaliditetom se zapošljavaju pod posebnim uslovima u privrednom društvu koja su osnovana radi zapošljavanja lica sa invaliditetom. Pod zapošljavanjem pod posebnim uslovima, u smislu ovog zakona, smatra se i zapošljavanje u organizacijama lica sa invaliditetom i samozapošljavanje (pokretanje obrta, obavljanje samostalne djelatnosti i obavljanje poljoprivredne djelatnosti kao jedinog i glavnog zanimanja).

**Privredno društvo za zapošljavanje lica sa invaliditetom i zaštitna radionica (čl. 24-31)**

**Čl. 24. i 25.** propisani su uslovi za sticanje statusa privrednog društva za zapošljavanje lica sa invaliditetom i zaštitne radionice, kao posebnih oblika u kojima se pod posebnim uslovima zapošljavaju lica sa invaliditetom od najmanje 60% invaliditeta. U odnosu na postojeći zakon ti uslovi su bitno izmijenjeni i postroženi, u skladu sa iskustvima iz prakse u primjeni zakona. Navedeno se posebno odnosi na uslove koji se tiču radnih mjesta kod tih privrednih društava, na način da ista moraju biti vidljiva i doprinositi procesu rada, iz razloga što je u praksi primijećen određen broj fiktivnih zapošljavanja lica sa invaliditetom, na osnovu kojih se ostvaruje status, a da ta lica uopće nemaju stvarnu ulogu u procesu rada kod tih poslodavaca.

**Čl. 26, 27. i 28.** propisan je postupak utvrđivanja statusa privrednog društva za zapošljavanje lica sa invaliditetom i zaštitne radionice. U odnosu sa postojeći zakon, navedeno pitanje je precizno uređeno, s tim da je zadržano rješenje prema kojem u tom postupku učestvuje Komisija za utvrđivanje statusa privrednog društva za zapošljavanje lica sa invaliditetom i zaštitne radionice, u kojoj mora biti jedan član kao predstavnik organizacija lica sa invaliditetom. Pored predstavnika organizacija lica sa invaliditetom, predviđeno je da će u Komisiji biti jedan predstavnik Fonda i tri predstavnika Federalnog ministarstva rada i socijalne politike. Rješenje o priznavanju statusa, odnosno rješenje o odbijanju zahtjeva za priznavanje statusa privrednog društva za zapošljavanje lica sa invaliditetom i zaštitne radionice donosi federalno ministarstvo nadležno za rad, na osnovu zapisnika Komisije za utvrđivanje statusa u kojem se konstatuje da li su ispunjeni uslovi propisani ovim zakonom za utvrđivanje statusa privrednog društva za zapošljavanje lica sa invaliditetom, odnosno zaštitne radionice.

**Članom 29.** propisano je da privredno društvo kojem je priznat status privrednog društva za zapošljavanje lica sa invaliditetom, odnosno zaštitne radionice, moraju kontinuirano bez prekida osiguravati zastupljenost lica sa invaliditetom u ukupnom broju zaposlenika sa punim radnim vremenom u srazmjeri koja je propisana ovim zakonom, te ispunjavati i druge propisane uslove.

**Čl. 30. i 31.** predviđeno je da nadzor nad kontinuitetom u ispunjavaju uslova za zadržavanje statusa privrednog društva za zapošljavanje lica sa invaliditetom, odnosno zaštitne radionice. Ukoliko prilikom vršenja nadzora, Fond utvrdi da su prestali postojati uslovi za zadržavanje statusa privrednog društva za zapošljavanje

lica sa invaliditetom, odnosno zaštitne radionice, dužan je o tome odmah obavijestiti federalno ministarstvo nadležno za rad, uz dostavljanje dokaza pribavljenih u postupku nadzora. Federalno ministarstvo nadležno za rad će na osnovu obavijesti Fonda i dokaza, odlučivati o ukidanju statusa privrednog društva za zapošljavanje lica sa invaliditetom, odnosno zaštitne radionice, te ukoliko se utvrdi da su prestali postojati uslovi za zadržavanje statusa taj status i ukinuti.

### **Olakšice pri zapošljavanju lica sa invaliditetom (čl. 32-39)**

**Članom 32.** propisane su olakšice za one poslodavce koji zapošljavaju lica sa invaliditetom u skladu sa ovim zakonom. S tim u vezi, predviđeno je da oni poslodavci koji zapošljavaju dovoljan broj lica sa invaliditetom u odnosu na ukupan broj zaposlenih na način propisan ovim zakonom, kao i oni poslodavci koji nemaju tu obavezu, a ipak zapošljavaju lica sa invaliditetom, te privredna društva za zapošljavanje lica sa invaliditetom i zaštitne radionice imaju pravo na poreske i carinske olakšice utvrđene poreskim i carinskim propisima, te pravo na stimulans predviđen ugovorom o zapošljavanju lica sa invaliditetom zaključenim sa Fondom, službom za zapošljavanje, Federalnim zavodom za penzijsko i invalidsko osiguranje, nadležnom službom socijalne zaštite, jedinicom lokalne uprave ili sa drugim poslodavcem. Također, kada su u pitanju privredna društva za zapošljavanje lica sa invaliditetom i zaštitne radionice, te organizacije lica sa invaliditetom koje imaju zaposlena lica sa invaliditetom, u njihovom slučaju je predviđeno da ista imaju pravo na pogodnosti na osnovu statusa poslodavca, te pravo na novčanu nadoknadu.

**Članom 33.** uređene su i druge olakšice na koje imaju pravo privredna društva za zapošljavanje lica sa invaliditetom i zaštitne radionice, na isti način na koji je to pitanje uređeno postojećim zakonom. S obzirom da se radi o oslobađanjima, odnosno beneficijama koje su uređene drugim propisima, propisano je da se način ostvarivanja istih bliže uređuje tim propisima.

**Članom 34.** predviđena je obaveza za sve poslodavce iz javnog sektora, odnosno one poslodavce kod kojih postoje vlasnička ili osnivačka prava Federacije, kantona, grada ili općine da najmanje 35% od svojih potreba za proizvodima i uslugama koje proizvode i pružaju privredna društva za zapošljavanje lica sa invaliditetom, zaštitne radionice i samostalne djelatnosti u vlasništvu lica sa invaliditetom, zadovolje od ovih privrednih društava, zaštitnih radionica i samostalnih djelatnosti u vlasništvu lica sa invaliditetom, pod uslovima koji važe na tržištu.

**Čl. 35. i 36.** definisano je pravo na novčanu nadoknadu kao jedne od olakšica za privredna društva za zapošljavanje lica sa invaliditetom, zaštitnih radionica, te organizacija lica sa invaliditetom ukoliko imaju zaposlena lica sa invaliditetom. Pod novčanom nadoknadom u smislu navedenog podrazumijeva se pravo na povrat plaćenog doprinosa za penzijsko i invalidsko osiguranje, plaćenog doprinosa za zdravstveno osiguranje, plaćenog doprinosa za osiguranje od nezaposlenosti i poreza na dohodak za zaposleno lice sa invaliditetom. Navedeno pravo je u slučaju organizacija lica sa invaliditetom ograničeno na najviše dva zaposlena lica sa invaliditetom sa najmanje 60% invaliditeta. Iako je navedeno pravo predviđeno za pravne subjekte kod kojih se lica sa invaliditetom zapošljavaju pod posebnim uslovima, ovim zakonom je ipak predviđeno da i poslodavci koji zapošljavaju veći broj lica sa invaliditetom pod općim uslovima na otvorenom tržištu rada od utvrđene obaveze, imaju pravo na povrat navedenog, i to za zaposlena lica sa invaliditetom sa

90% i 100% invaliditeta. Članom 35. izričito propisano da isplata novčane nadoknade u smislu povrata uplaćenih doprinosa i poreza na dohodak, predstavlja prioritet u smislu trošenja sredstava i podmirivanje obaveza Fonda. Kada je u pitanju isplata novčane nadoknade, propisano je način podnošenja zahtjeva za isplatu, te predviđeno da se novčana nadoknada isplaćuje u roku od 30 dana od dana podnošenja zahtjeva.

**Članom 37.** uređeno je pitanje subvencioniranja dijela neto plaće za zaposlene u zaštitnoj radionici, na način da je propisano da privredno društvo za zapošljavanje lica sa invaliditetom koje ostvari status zaštitne radionice u skladu sa ovim zakonom ima pravo na novčanu nadoknadu iz ovog zakona za sve zaposlenike i pravo na subvenciju neto plaće zaposlenih lica sa invaliditetom u visini 35% od prosječne neto plaće u Federaciji, prema podacima Federalnog zavoda za statistiku. Pravo na subvenciju neto plaće u pomenutom iznosu predviđeno je i u slučaju organizacija lica sa invaliditetom ali za najviše dva zaposlena lica sa invaliditetom od najmanje 90%.

**Član 38.** odnosi se na stimulanse za zapošljavanje lica sa invaliditetom koji se odnose na jednokratna materijalna davanja, sredstva za prilagođavanje radnog mjesta i uslova rada kod poslodavca, sredstva—namjenjena kupovini strojeva, opreme, alata, pribora potrebnog za odvijanje poslovnog procesa kod poslodavca, sredstva za nabavku i adaptaciju poslovnog prostora i sredstva naknade razlike zbog smanjenog radnog učinka ili za sufinansiranje dijela plaće asistenta (pomagača u radu) lica sa invaliditetom u toku rada, a što će se detaljno urediti pravilnikom Fonda.

**Članom 39.** propisano je da prava iz člana 32. ovog zakona, izuzev prava koja imaju zaštitne radionice, pripadaju i licima sa invaliditetom koja obavljaju samostalnu djelatnost ili poljoprivrednu djelatnost kao jedino i glavno zanimanje.

#### **Fond za profesionalnu rehabilitaciju i zapošljavanje osoba sa invaliditetom (čl. 40-46)**

**Članom 40.** definisano je da je Fond javna ustanova čiji je osnivač Parlament Federacije Bosne i Hercegovine. Naime, Fond za profesionalnu rehabilitaciju i zapošljavanje osoba sa invaliditetom osnovan je Odlukom Parlamenta Federacije Bosne i Hercegovine („Službene novine Federacije BiH“, broj: 48/10). Istom odredbom, a u skladu sa pomenutom odlukom propisane su nadležnosti Fonda, s tim da je za razliku od postojećih nadležnosti, dodatno predviđeno da Fond vrši dodjelu posebnih sredstava za inovativne programe i posebne programe zapošljavanja lica sa invaliditetom, te vrši izbor i dodjeljuje nagradu za najboljeg poslodavca za zapošljavanje lica sa invaliditetom. Na taj način se utiče na afirmaciju zapošljavanja lica sa invaliditetom pod općim uslovima na otvorenom tržištu rada.

**Član 41.** odnosi se na prihode Fonda iz kojih Fond pomiruje svoje obaveze. Prihod Fonda ustvari predstavljaju sredstva posebnog doprinosa za zapošljavanje lica sa invaliditetom koji su dužni uplaćivati svi poslodavci koji ne zapošljavaju lica sa invaliditetom u skladu sa utvrđenom obavezom. Istom odredbom je propisano da ako sredstva Fonda nisu dovoljna za podmirenje obaveza nastalih u toku godine, i to obaveza za isplatu novčane nadoknade iz člana 35. ovog zakona i subvencije plaće iz člana 37. ovog zakona, nedostajuća sredstava osigurati će se iz Budžeta Federacije. Dakle, jedina situacija u kojoj bi se Fond mogao finansirati iz Budžeta Federacije BiH, je ukoliko bi nedostajalo sredstava za isplatu novčane nadoknade



koja podrazumijeva povrat uplaćenih doprinosa i poreza na dohodak na način propisan ovim zakonom, te za subvencije plaće, za koje je svakako predviđeno da predstavljaju prioritet u podmirivanju obaveza Fonda.

**Čl. 42, 43, 44. i 45.** odnosi se na organe upravljanja, nadzora i rukovođenja Fonda u vidu upravnog i nadzornog odbora, te direktora. Ovo što predstavlja novinu u odnosu na postojeći zakon jest da su propisani uslovi za izbor u navedene organe, dok je u slučaju sastava upravnog odbora Fonda predviđeno da u istom moraju biti i predstavnici reprezentativnog udruženja poslodavaca na teritoriji Federacije BiH, imajući u vidu izvore prihoda Fonda. Zadržano je rješenje da u upravnom odboru moraju biti i predstavnici organizacija lica sa invaliditetom, koje su osnivači ili vlasnici ustanova i privrednih društava za profesionalnu rehabilitaciju i zapošljavanje lica sa invaliditetom. Kada je u pitanju nadzorni odbor, predviđeno je da najmanje jedan član mora biti predstavnik organizacija lica sa invaliditetom.

**Članom 46.** uređeno je pitanje postupanja Fonda kod isplate korisnicima sredstava.

#### **Nadzor i kaznene odredbe (čl. 47-50)**

**Članom 47.** predviđeno je da nadzor nad korištenjem sredstava Fonda vrši Federalno ministarstvo finansija prema svojim nadležnostima i u skladu sa zakonom, te je u tom smislu zadržano zakonsko rješenje iz postojećeg zakona. Ono što je novina jest da je istom odredbom predviđeno da će se radi ispunjavanja obaveza iz ovog zakona Fond, Porezna uprava Federacije BiH i poslodavci povezati kroz informacijski sistem, što će se urediti podzakonskim aktom kojeg donosi federalni ministar u saradnji sa Fondom i Poreznom upravom Federacije. Naime, takav informacijski sistem će olakšati ispunjavanje obaveza poslodavcima, u smislu da će im biti olakšano da prate obim svojih obaveza, a pored toga isti bi trebao olakšati kontorlu obračuna i uplate doprinosa koja je ovim zakonom stavljena u nadležnost Poreznoj upravi Federacije BiH.

**Član 48.** odnosi se na nadzor nad zakonitošću rada Fonda i nadzor nad stručnim radom ustanova za profesionalnu rehabilitaciju.

**Članom 49.** propisano je da poslove inspekcijskog nadzora nad provođenjem ovog zakona obavljaju Porezna uprava Federacije BiH i nadležne inspekcije rada, svako u okviru svoje nadležnosti.

**Članom 50.** propisane su vrste i visine prekršaja za nepostupanje u skladu sa određenim obavezama iz ovog zakona. Naime, predviđena je novčana kazna za poslodavce koji ne uplaćuju poseban doprinos za zapošljavanje lica sa invaliditetom, te novčana kazna za poslodavce iz javnog sektora koji postupaju suprotno odredbi člana 19. ovog zakona, odnosno koji ne daju prednost pri zapošljavanju licu sa invaliditetom na način propisan ovim zakonom. S obzirom da su kroz primjenu postojećeg zakona u praksi evidentirane određene zloupotrebe kada su u pitanju postupanja privrednih društava za zapošljavanje lica sa invaliditetom predviđene su novčane kazne u slučaju kada to privredno društvo fiktivno zaključi ugovor o radu sa licem sa invaliditetom, na način da to lice uopće ne obavlja poslove iz zaključenog ugovora o radu, ako bez prethodne saglasnosti Fonda otuđi ili na drugi način raspolaže sredstvima i opremom nabavljenom od sredstava Fonda, te ako postupa suprotno ugovoru zaključenim sa Fondom radi realizacije finansiranja i sufinansiranja

programa iz člana 40. ovog zakona. U slučaju fiktivnog zapošljavanja predviđena je i novčana kazna za lice sa invaliditetom koje sa privrednim društvom za zapošljavanje lica sa invaliditetom zaključi fiktivni ugovor o radu, na način da uopće ne obavlja poslove iz zaključenog ugovora o radu, a da o tome ne obavijesti Fond u pisanom obliku.

#### **Prijelazne i završne odredbe (čl. 51-54)**

**Članom 51.** propisani su uslovi za zadržavanje statusa privrednih društava za zapošljavanje lica sa invaliditetom i zaštitnih radionica. Naime, ovim zakonom su izmijenjeni uslovi za sticanje statusa privrednih društava za zapošljavanje lica sa invaliditetom i zaštitnih radionica, te će i oni koji budu imali ostvaren taj status u skladu sa odredbama postojećeg zakona biti u obavezi da ispune uslove propisane ovim zakonom kako bi taj status zadržali.



**Čl. 52. i 53.** propisani su rokovi za donošenje, odnosno usklađivanje podzakonskih akta predviđenih ovim zakonom, odnosno rokovi za usklađivanje općih akata Fonda sa ovim zakonom.

**Članom 54. i 55.** predviđeno je da danom stupanja na snagu ovog zakona prestaje da važi Zakon o profesionalnoj rehabilitaciji, osposobljavanju i zapošljavanju osoba sa invaliditetom („Službene novine Federacije BiH“, broj: 9/10), te da ovaj zakon stupa na snagu osmog dana od dana objavljivanja u „Službenim novinama Federacije BiH“.

#### **V - FINANSIJSKA SREDSTVA**

Za provođenje ovog zakona nije potrebno osigurati dodatna finansijska sredstva u Budžetu Federacije Bosne i Hercegovine.

## Obrazac i uputstvo za popunjavanje izjave o usklađenosti

IZJAVA O USKLAĐENOSTI		
1. Podaci o obrađivaču propisa	Naziv federalnog organa uprave, odnosno federalne upravne organizacije	Federalno ministarstvo rada i socijalne politike
	Naziv organizacione jedinice	Sektor za zaštitu i inkluziju osoba sa invaliditetom, civilnih žrtava rata i jedinstveni registar
2. Naziv propisa		Zakon o profesionalnoj rehabilitaciji i zapošljavanju lica sa invaliditetom - prednacrt Law on professional rehabilitation and employment of persons with disabilities - preliminary draft
3. Usklađenost propisa s odredbama Sporazuma o stabilizaciji i pridruživanju		
3.1.	Odredba Sporazuma	Glava VIII Politike saradnje, čl. 99 (Saradnja u oblasti socijalne politike)
3.2.	Ocjena ispunjenosti iz navedene odredbe Sporazuma	Ispunjava u potpunosti
3.3.	Razlozi za djelimično ispunjavanje odnosno neispunjavanje obaveze iz navedene odredbe Sporazuma i rok u kojem je predviđeno postizanje potpune usklađenosti	
4. Veza propisa sa Programom integrisanja (PI)		
4.1.	PI za period	
4.2.	Poglavlje, potpoglavlje	
4.3.	Rok za donošenje propisa	
4.4.	Napomena	
5. Usklađenost propisa s pravnom tečevinom EU		
5.1.	Primarni izvori prava EU	Ugovor o funkcioniranju Evropske unije (prečišćeni tekst 2016); Dio treći Politike i unutrašnje djelovanje Unije; Glava X. Socijalna politika, čl. 153. i 156. <i>Treaty on the Functioning of the European Union (Consolidated version 2016); Part Three Union Policies and Internal Actions; Title X Social Policy, Articles 153 and 156</i>  Djelimično usklađeno
5.2.	Sekundarni izvori prava EU	Direktiva Vijeća 2000/78/EZ od 27. novembra 2000. godine o uspostavi općeg okvira za jednako postupanje pri zapošljavanju i obavljanju zanimanja (Sl. L. 303, 2.12.2000) Ispravak Direktive Vijeća 2000/78/EZ od 27. studenoga 2000. o uspostavi općeg okvira za jednako postupanje pri zapošljavanju i obavljanju zanimanja (SL L 63, 3.3.2020)  Council Directive 2000/78/EC of 27 November 2000 establishing a general framework for equal treatment in employment and occupation (OJ L 303, 2.12.2000)
5.3.	Stepen usklađenosti sa sekundarnim izvorima prava	Djelimično usklađeno
5.4.	Razlozi za djelimičnu usklađenost ili neusklađenost	S obzirom da se predmet ovog Zakona odnosi na zapošljavanje osoba sa invaliditetom, a da označena Direktiva Vijeća uspostavlja okvir za borbu protiv diskriminacije ne samo po osnovu invaliditeta, već po više osnova koji su predmet drugih propisa, to se ovim propisom nije moglo izvršiti potpuno usklađivanje sa Direktivom.
5.5.	Rok za potpuno usklađivanje	Rok predviđen Sporazumom o stabilizaciji i pridruživanju između Evropskih zajednica i njihovih država članica, s jedne strane, i Bosne Hercegovine s druge strane („Službeni glasnik BiH – Međunarodni ugovori“, br. 10/08, 1/17 i 8/17) istekao. Punu usklađenost sa Direktivom nije bilo moguće postići jer ista zavisi od usklađivanja drugih propisa koji za predmet imaju sprečavanje diskriminacije, a koji su doneseni na državnome nivou.
5.6.	Ostali izvori prava EU	
6. Ukoliko ne postoje odgovarajući propisi EU sa kojima je potrebno izvršiti usklađivanje potrebno je to konstatovati		
7.	Da li je osiguran prevod pravnih izvora na službene jezike u upotrebi u Federaciji Bosne i Hercegovine	Da
8.	Da li je propis preveden na engleski jezik?	Ne
Ministar Adnan Delić  Potpis		Direktor Ureda Vlade Federacije Bosne i Hercegovine za zakonodavstvo i usklađenost sa propisima Evropske unije Željko Siladi Potpis 
Datum i pečat: 12.01.2024. godine		Datum i pečat: 12.01.2024

KONTROLNA IZJAVA O PROVEDENOJ PROCJENI UTJECAJA PROPISA

Kontrolna izjava o provedenoj procjeni utjecaja propisa		
Naziv prednacrta/nacrta zakona	Prednacrt zakona o profesionalnoj rehabilitaciji i upošljavanju osoba s invaliditetom	
Datum	17.01.2024. godine	
Kontrolno područje	DA	Objasnjeno Ureda
<b>AKTIVNOST</b>		
Naziv prednacrta/nacrta zakona je naveden i razumljiv	DA	
Naveden je naziv i kontakti obrađivača	DA	
Naveden je datum	DA	
<b>DEFINIRANJE PROBLEMA</b>		
Problem je jasno i sažeto objašnjen	DA	
Ciljevi su jasno i sažeto objašnjeni	DA	
Očekivani rezultati su jasno i sažeto objašnjeni	DA	
<b>KONZULTACIJE</b>		
Zainteresirane strane su jasno definirane	DA	
Proces konzultacija je jasno i sažeto objašnjen	DA	
<b>PREDLOŽENA RJEŠENJA</b>		
Predložena su normativna i nenormativna rješenja	DA	
Definirani su rizici predloženog rješenja	DA	
Definiran je utjecaj rješenja na proračun	DA	
Definiran je utjecaj rješenja na gospodarstvo, društvo, okoliš, te održivi razvoj i zdravlje ljudi	DA	
Definiran je način primjene i usuglašenost s ostalim propisima	DA	
Definirano je prijelazno razdoblje	DA	
PROCJENA PROVEDENA SUKLADNO UREDBI	DA	

URED VLADE FBiH ZA ZAKONODAVSTVO I USKLADENOST  
SA PROPISIMA EUROPSKE UNIJE  
Željko Siladi, direktor Ureda

Datum i pečat: 17.01.2024. godine


OVLASŦENA OSOBA

*Andrija Herber*



**OBRAZAC IZJAVA O FISKALNOJ PROCJENI**

Obrazac IFP NE

A 1. Obrađivač propisa						
Razdjel	KOD	NAZIV				
	5101	Federalno ministarstvo rada i socijalne politike				
B 2. Osnovni podaci o prijedlogu propisa						
Vrsta propisa/akta	Zakon	DA	Odluka	NE	Strategija	NE
	Uredba	NE	Drugi akti	NE	Drugi akti planiranja	NE
Naziv propisa/akta	Zakon o profesionalnoj rehabilitaciji i zapošljavanju osoba sa invaliditetom u Federaciji BiH					
C 3. Izjava o nepostojanju fiskalnih efekata predloženog propisa						
<p>Provedba ovog zakona neće imati negativne implikacije po Budžet Federacije Bosne i Hercegovine kako u tekućoj 2023. godini, tako niti ubuduće. Radi se o novom zakonu koji će regulisati uslove zapošljavanja osoba sa invaliditetom pod općim i posebnim kriterijima. Finansiranje će se provoditi na način da će poslodavci koji ne zaposle zakonom određeni broj OSI biti dužni uplatiti u Fond za profesionalnu rehabilitaciju i zapošljavanje osoba sa invaliditetom propisani novčani iznos, a ta će se sredstva raspoređivati onim poslodavcima koji kreiraju radna mjesta za OSI i zapošljavaju ih. Također, provedba ovog zakona neće imati implikacije niti po budžete kantona.</p>						
D 4. Pečat i potpis odgovornog lica					Mjesto i datum	, 19-12-2023





196

01/06/24

Broj: 03-02-13535-8/2023  
Dana, 29.1.2024. godine

*Jorih*

SKUPŠTINA UNSKO-SANSKOG KANTONA

BOSNA I HERCEGOVINA FEDERACIJA BOSNE I HERCEGOVINE UNSKO-SANSKI KANTON SKUPŠTINA UNSKO-SANSKOG KANTONA		
PRILAGODBA:	01.06.2024	
Članak 101	011-01-315-3/24	199

BOSNA I HERCEGOVINA  
FEDERACIJA BOSNE I HERCEGOVINE  
FEDERALNO MINISTARSTVO  
RADA I SOCIJALNE POLITIKE  
SARAJEVO  
Broj: 06-02/2-3925/23  
Sarajevo, 07-02-2024

PREDMET: Mišljenje na Prednacrt Zakona o profesionalnoj rehabilitaciji  
i zapošljavanju lica s invaliditetom, dostavlja se;-

Na osnovu člana 96. i 181. Poslovnika Skupštine Unsko-sanskog kantona („Službeni glasnik Unsko-sanskog kantona“, broj: 9/17 i 11/21), u prilogu Vam dostavljamo Mišljenje na Prednacrt Zakona o profesionalnoj rehabilitaciji i zapošljavanju lica s invaliditetom, uz sljedeće

o b r a z l o ž e n j e

Vlada Unsko-sanskog kantona je na 14. sjednici, održanoj dana 29.1.2024. godine, dala Mišljenje broj: 03-02-51-199/2024 na Prednacrt Zakona o profesionalnoj rehabilitaciji i zapošljavanju lica s invaliditetom, koji vam se upućuje u daljnju proceduru u skladu sa odredbama Poslovnika Skupštine Unsko-sanskog kantona.

S poštovanjem.

Prilog: Mišljenje

Dostavljeno:  
1. Naslovu (4x)  
2. a/a





Na osnovu člana 16. Zakona o Vladi Unsko-sanskog kantona („Službeni glasnik Unsko-sanskog kantona“, broj 5/08) i člana 182. stav (1) tačka b) Poslovnika Skupštine Unsko-sanskog kantona („Službeni glasnik Unsko-sanskog kantona“, broj: 9/17 i 11/21), na prijedlog Ministarstva zdravstva, rada i socijalne politike, Vlada Unsko-sanskog kantona na 14. sjednici, održanoj dana 29.1.2024. godine, d a j e

## M I Š L J E N J E

na Prednacrt Zakona o profesionalnoj rehabilitaciji i zapošljavanju lica s invaliditetom

Od donošenja Zakona o profesionalnoj rehabilitaciji i zapošljavanju lica s invaliditetom („Službene novine Federacije Bosne i Hercegovine“, broj 9/10) je proteklo više od 13 godina te je primjena ovog Zakona, u tom periodu, pokazala da postoji prostor za unapređenje ove oblasti, odnosno postoji prostor da se koriguju svi oni elementi koji nisu bili na najbolji način uređeni.

Zbog značaja ovog Zakona, Ministarstvo zdravstva, rada i socijalne politike je, u pripremi prijedloga mišljenja, dostavilo na izjašnjenje Prednacrt ovog Zakona i udruženjima osoba sa invaliditetom, JU „Službi za zapošljavanje USK“ Bihać te Kantonalnoj upravi za inspeksijske poslove. Na ovaj način se htjelo da se u izjašnjenje na ovaj propis uključe relevantni subjekti iz Unsko-sanskog kantona na koji će se zakon direktno odnositi ili koji će ga primjenjivati. Ovi subjekti iznijeli su svoje stajalište o ovom Prednacrtu. U vezi s tim, ističemo da je Kantonalna uprava za inspeksijske poslove dala pozitivno mišljenje na Prednacrt ovog Zakona, dok Služba za zapošljavanje Unsko-sanskog kantona nije imala primjedbi na isti. Što se tiče udruženja osoba s invaliditetom, isti su imali određenih primjedbi, te ćemo njihova stajališta, u dijelu u kojem se poklapaju sa mišljenjem Ministarstva zdravstva, rada i socijalne politike, navesti u obrazlaganju pojedinih odredbi.

Prednacrt ovog propisa donosi određene novine za koje smatramo da će doprinijeti profesionalnoj rehabilitaciji i zapošljavanju lica s invaliditetom. Međutim, postoje i određena pitanja koja bi trebalo bolje urediti i dodatno precizirati.

Mišljenja smo da su ovim Prednacrtom obuhvaćena pitanja koja postojećim zakonom nisu bila na najbolji način uređena, a to se posebno odnosi na kontrolu naplate posebnog doprinosa za zapošljavanje lica sa invaliditetom.

Naime, članom 20. ovog Prednacrt Zakona propisano je da kontrolu obračuna i uplate posebnog doprinosa za zapošljavanje lica sa invaliditetom vrši Porezna uprava Federacije BiH. Ovo pitanje nije bilo regulisano postojećim zakonom te isto predstavlja jednu od najbitnijih novina ovog propisa, s obzirom da će se na ovaj način riješiti pitanje naplate posebnog doprinosa od strane onih poslodavaca koji ne zapošljavaju lica sa invaliditetom. Ova činjenica će doprinijeti ili povećanju broja zaposlenih lica sa invaliditetom na otvorenom tržištu ili će dovesti do povećanja sredstava u budžetu Fonda, a koja će biti namijenjena za novčane nadoknade u vidu povrata doprinosa, stimulanse za zapošljavanje lica sa invaliditetom,

subvencije plaće za lica sa invaliditetom te finansiranje programa za održavanje zaposlenosti lica sa invaliditetom i programa za razvoj privrednih društava za zapošljavanje lica sa invaliditetom i zaštitnih radionica.

Također se u članu 20. stav (4) Prednacrtu Zakona uvodi određena novina. Naime, u slučaju da poslodavac zaposli osobu s invaliditetom od najmanje 90% invaliditeta, smatrat će se da je zaposlio dvije osobe s invaliditetom, u kontekstu člana 20. stav (1) Prednacrtu.

Ovom izmjenom dala se prednost zapošljavanju teže zaposljivih osoba s invaliditetom u odnosu na broj zaposlenih osoba s invaliditetom te ovu izmjenu smatramo opravdanom. Udruženja osoba sa invaliditetom smatraju da je ova izmjena štetna za osobe sa invaliditetom i da je treba brisati. Međutim, imajući u vidu da je najteže zaposliti osobe sa 90% i 100% invaliditeta, mišljenja smo da bi u ovom slučaju bilo bolje dati prednost zapošljavanju teže zaposljivih osoba u odnosu na broj zaposlenih osoba.

Također je bolje uređen postupak utvrđivanja statusa privrednog društva za zapošljavanje lica sa invaliditetom i zaštitne radionice preciznije uređeno, u odnosu na postojeći zakon. Naime, članom 26., 27. i 28 Prednacrtu Zakona detaljnije se uređuje ovaj postupak te će zasigurno biti manje nedoumica u vezi s ovim postupkom.

U odnosu na postojeći zakon, određenu novinu ovog Prednacrtu predstavlja i propisivanje uvjeta za izbor u organe upravljanja, nadzora i rukovođenja Fonda za profesionalnu rehabilitaciju i zapošljavanje lica s invaliditetom (član 42., 43., 44. i 45. Prednacrtu). Propisivanje uvjeta će zasigurno doprinijeti boljem izboru stručnog kadra, a to će se odraziti i na kvalitetnije upravljanje ovom institucijom.

Međutim, članom 11. Prednacrtu ovog Zakona regulira se rad ustanova za profesionalnu rehabilitaciju, te smo mišljenja da bi stav (2) ovog člana trebalo bolje urediti. Naime, u stavu (2) ovog člana navodi se da bi bliže uslove za osnivanje i rad ustanove trebalo da propiše kantonalni ministar nadležan za poslove socijalne zaštite. Mišljenja smo da bi na ovaj način došlo do propisivanja različitih uslova za osnivanje ovih ustanova te do razlika između kantona. Na ovaj način došlo bi, u konačnici, do toga da bi u pojedinom kantonu bilo lakše osnovati ustanovu za profesionalnu rehabilitaciju te da bi osobe sa invaliditetom u tom kantonu bi bile u boljem položaju od osoba sa invaliditetom u onom kantonu u kojem su strožiji uslovi. Smatramo da bi propisivanje uslova trebalo da uradi federalni ministar rada i socijalne politike te bi na taj način uslovi za osnivanje ustanova za profesionalnu rehabilitaciju bili isti u svim kantonima.

U članu 20. stav (1) Prednacrtu Zakona očigledno je uvažen prijedlog poslodavaca da na svakih 17 uposlenika poslodavci imaju obavezu upošljavanja jedne osobe s invaliditetom te da se ova kvota u narednih tri godine poveća kako bi se 2027. godine na 20 uposlenih upošljavala jedna osoba s invaliditetom.

U pogledu ove odredbe, mišljenja smo da je ista štetnija za osobe s invaliditetom, u odnosu na postojeći zakon u kojem stoji da poslodavci treba da zaposle jednu osobu s invaliditetom na 16 uposlenih. Ovu odredbu su istakla i udruženja osoba s invaliditetom kao štetnu za osobe s invaliditetom. Jednako kao i ova udruženja, mišljenja smo da novim zakonom treba zadržati kvotu da se na 16 zaposlenih zapošljava jedna osoba s invaliditetom.

Članom 20. stav (3) Prednacrtu i dalje je ostala propisana obaveza uplate posebnog doprinosa u visini od 25% od prosječne neto plate u FBiH, za one poslodavce koji ne zaposle određeni broj osoba s invaliditetom u odnosu na ukupan broj zaposlenika. Međutim, udruženja




osoba s invaliditetom sa područja Unsko-sanskog kantona su istakla da bi trebalo povećati uplatu posebnog doprinosa sa 25% na 40%.

Povećanje posebnog doprinosa bi utjecalo na poslodavce u smislu da bi isti više zapošljavali osobe s invaliditetom ili bi se više sredstava prikupilo po tom osnovu. Međutim, mišljenja smo da bi povećanje posebnog doprinosa trebalo biti zadnja opcija. Mišljenja smo da ovaj propis pruža dosta stimulacija za poslodavce u cilju zapošljavanja osoba s invaliditetom, te da trenutno ne treba pribjegavati ovoj mjeri. Povećanje kontrole obračuna i uplata posebnog doprinosa će zasigurno dovesti do povećanja iznosa sredstava koji će biti uplaćeni po tom osnovu te ni sa tog aspekta trenutno nije potrebno povećavati iznos. Dakle, smatramo da je iznos koji je određen u Prednacrta Zakona trenutno dovoljan te da trenutno ne treba pribjegavati ovoj mjeri.

Dakle, smatramo da bi ovakav tekst Prednacrta Zakona o profesionalnoj rehabilitaciji i zapošljavanju lica s invaliditetom popravio stanje kada je u pitanju profesionalna rehabilitacija i zapošljavanje lica s invaliditetom i da bi isti trebalo podržati, uz prihvatanje gore navedenih primjedbi.

Broj: 03-02-51-199/2024  
Bihać, 29.1.2024. godine





Broj: 01-02-3370-1/24  
Zenica, 21.02.2024. godine

BOSNA I HERCEGOVINA  
FEDERACIJA BOSNE I HERCEGOVINE  
MINISTARSTVO RADA I SOCIJALNE POLITIKE  
n/r ministra  
ul. Hamdije Čemerlića br. 2  
71000 SARAJEVO

FEDERACIJA BOSNE I HERCEGOVINE  
FEDERALNO MINISTARSTVO  
RADA I SOCIJALNE POLITIKE  
SARAJEVO

Broj: \_\_\_\_\_  
Sarajevo, 06-02/1-3925/23  
23-02-2024

**PREDMET: Zaključak sa 22. sjednice Skupštine Zeničko-dobojskog kantona s priložima, dostavlja se**  
**VEZA: Vaš akt broj: 06-02/1-3925/23 od 18.12.2023. godine**

Postupajući po Vašem aktu veze broj i datum gornji, kojim ste tražili dostavljanje **mišljenja kantonalnih skupština na Prednacrt Zakona o profesionalnoj rehabilitaciji i zapošljavanju lica sa invaliditetom**, u prilogu Vam dostavljamo **Zaključak Skupštine Zeničko-dobojskog kantona broj: 01-02-3370/24 od 21.02.2024. godine**, donesen na 22. sjednici Skupštine Zeničko-dobojskog kantona održanoj **21.02.2024. godine**, kojim je utvrđeno Mišljenje Skupštine Zeničko-dobojskog kantona povodom dostavljenog Prednacrt Zakona.

U prilogu navedenog Zaključka Skupštine, kao njegov sastavni dio nalazi se Zaključak Vlade Kantona broj: 02-02-2676/24 od 09.02.2024. godine, kao i mišljenje Ministarstva za rad, socijalnu politiku i izbjeglice Zeničko-dobojskog kantona broj: 09-02-19193-1/23 od 29.01.2024. godine, koje je Vlada Zeničko-dobojskog kantona prihvatila svojim zaključkom broj i datum gornji, kao i Mišljenje skupštinske Komisije za rad, socijalnu politiku izbjeglice i zdrastvo sadržano u njenom Izvještaju broj: 01-30-2919-1/24 od 16.02.2024. godine i isti se smatraju Mišljenjem Skupštine Zeničko-dobojskog kantona datim na Prednacrt ovog Zakona.

Navedeni Zaključak Skupštine, sa pomenutim priložima, dostavljamo Vam kako bi u toku provođenja dalje propisane procedure za donošenje navedenog zakona u Federaciji BiH, imali u vidu dato Mišljenje Skupštine Zeničko-dobojskog kantona povodom dostavljenog Prednacrt Zakona.

S poštovanjem,

**PRILOZI: Kao u dopisu**

**DOSTAVLJENO:**

- 1 x Naslovu
- 1 x Vladi Ze-do kantona, *n/r sekretara*
- 1 x Ministarstvu za rad, socijalnu politiku i izbjeglice Ze-do kantona, *n/r ministra*
- 2 x U Registrator **22. sjednice Skupštine/05-03**



Na osnovu člana 99. stav 1., a u vezi sa članom 102. i članom 106c. Poslovnika Skupštine Zeničko-dobojskog kantona – Treći prečišćeni tekst („Službene novine Zeničko-dobojskog kantona”, broj: 14/18, 18/18-Isp., 7/19, 7/20 i 16/23), Skupština Zeničko-dobojskog kantona, na 22. sjednici održanoj dana 21.02.2024. godine, donosi:

## ZAKLJUČAK

### I.

Skupština Zeničko-dobojskog kantona ovim Zaključkom utvrđuje svoje mišljenje povodom dostavljenog Prednacrta Zakona o profesionalnoj rehabilitaciji i zapošljavanju lica sa invaliditetom.

### II.

Mišljenje Ministarstva za rad, socijalnu politiku i izbjeglice Zeničko-dobojskog kantona o navedenom Prednacrta Zakona, broj: 09-02-19193-1/23 od 29.01.2024. godine, koje je Vlada Zeničko-dobojskog kantona prihvatila svojim Zaključkom broj: 02-02-2676/24 od 09.02.2024. godine i koji je uputila u dalju skupštinsku proceduru, čini sastavni dio i ovog Zaključka, kao i mišljenje skupštinske Komisije za rad, socijalnu politiku, izbjeglice i zdravstvo sadržano u njenom Izvještaju broj: 01-30-2919-1/24 od 16.02.2024. godine i isti se smatraju Mišljenjem Skupštine Zeničko-dobojskog kantona datim na Prednacrt Zakona o profesionalnoj rehabilitaciji i zapošljavanju lica sa invaliditetom.

### III.

Ovaj Zaključak stupa na snagu danom donošenja i bit će dostavljen Federalnom ministarstvu rada i socijalne politike zajedno sa Mišljenjem Ministarstva za rad, socijalnu politiku i izbjeglice Zeničko-dobojskog kantona o navedenom Prednacrta Zakona, broj: 09-02-19193-1/23 od 29.01.2024. godine, koje je Vlada Zeničko-dobojskog kantona prihvatila svojim Zaključkom broj: 02-02-2676/24 od 09.02.2024. godine, te mišljenjem skupštinske Komisije za rad, socijalnu politiku, izbjeglice i zdravstvo sadržanim u njenom Izvještaju broj: 01-30-2919-1/24 od 16.02.2024. godine, a radi nastavka daljih aktivnosti u vezi sa Prednacrtom ovog Zakona.

Broj: 01-02-3370/24  
Datum, 21.02.2024. godine  
Zenica

PREDSJEDAVAJUĆI



T-5

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za rad, socijalnu politiku i izbjeglice, Vlada Zeničko-dobojskog kantona, na 16. sjednici, održanoj dana 09.02.2024. godine, d o n o s i

SKUPŠTINA ZENIČKO-DOBOJSKOG KANTONA			
Primljeno	13.02.2024.		
Org.jed.	Broj	Službeni broj	Vrijednost
01-	02-	2676	/24

## ZAKLJUČAK

### I.

Prihvata se Mišljenje Ministarstva za rad, socijalnu politiku i izbjeglice, broj: 09-02-19193-1/23 od 29.01.2024. godine, o Prednacrtu Zakona o profesionalnoj rehabilitaciji i zapošljavanju lica sa invaliditetom, koji je kantonalnim skupštinama dostavljen na mišljenje od strane Federalnog ministarstva rada i socijalne politike.

### II.

Zaključak Vlade Zeničko-dobojskog kantona sa Mišljenjem Ministarstva za rad, socijalnu politiku i izbjeglice iz tačke I. ovog zaključka upućuje se u dalju skupštinsku proceduru.

### III.

Zaključak stupa na snagu danom donošenja.

Broj: 02-02-2676 /24  
Datum, 09.02.2024. godine  
Zenica

DOSTAVLJENO:  
1x Ministarstvo za rad, socijalnu politiku i izbjeglice,  
 Stručna služba Skupštine,  
1x a/a.



PREMIJER

mir Pivić



**ZENIČKO DOBOJSKI KANTON**  
**VLADA**

n/r Premijera  
n/r Sekretara

Broj: 09-02-19193-1/23  
Zenica, 29.01.2024. godine

**PREDMET: Mišljenje o Prednacrtu Zakona o profesionalnoj rehabilitaciji i zapošljavanju  
lica sa invaliditetom, dostavlja se**

Federalno ministarstvo rada i socijalne politike je aktom broj: 06-02/1-3925/23 od 18.12.2023. godine, skupštinama kantona dostavilo tekst Prednacrtu Zakona o profesionalnoj rehabilitaciji i zapošljavanju lica sa invaliditetom, (u daljem tekstu: Prednacrt Zakona) radi davanja mišljenja na predloženi tekst, budući da je oblast socijalne politike u zajedničkoj nadležnosti federalne vlasti i kantona, u skladu sa članom III.2 i III.3 Ustava Federacije.

Aktom Stručne službe Skupštine, broj: 01-02-19193-1/23 od 26.12.2023. godine, ovom ministarstvu je kao resornom dostavljen na mišljenje tekst Prednacrtu Zakona.

Nakon razmatranja dostavljenog teksta Prednacrtu Zakona ovo ministarstvo u okviru svoje nadležnosti daje sljedeće:

**MIŠLJENJE**

Uvidom u dostavljeni Prednacrt Zakona, utvrđeno je da se ovim Prednacrtom Zakona na drugačiji način uređuje oblast profesionalne rehabilitacije i zapošljavanja osoba sa invaliditetom od dosadašnjeg koji je bio uređen Zakonom o profesionalnoj rehabilitaciji i zapošljavanju lica sa invaliditetom iz 2010. godine. Naime, u periodu od trinaest godina od kada se po prvi put zakonom uredila predmetna oblast, ukazala se potreba za drugačijim zakonskim rješenjima koja za cilj u konačnici imaju povećanje zaposlenosti lica sa invaliditetom pod općim uslovima i njihovo ravnopravno učešće na tržištu rada uz otklanjanje barijera i stvaranje jednakih mogućnosti na tržištu rada.

Nakon razmatranja dostavljenog teksta Prednacrtu Zakona, ovo ministarstvo načelno podržava predložena zakonska rješenja i uređenje ove oblasti koje treba doprinijeti efikasnijoj primjeni istog u praksi, ali ujedno ukazujemo na sljedeće:

- Članom 11. Prednacrtu Zakona u stavu (3) propisano je da će bliže uslove za osnivanje i rad ustanove, posebno u pogledu prostora, opreme i stručnog kadra, propisati kantonalni ministar nadležan za poslove socijalne zaštite. Smatramo da bi takve uslove trebao na jedinstven način urediti federalni ministar nadležan za poslove socijalne zaštite, s ciljem osiguranja jednakih uslova za teritorij Federacije BiH, jer se prema predloženom rješenju ostavlja prostor da se uslovi za osnivanje i rad ustanove drugačije propišu od kantona do kantona.

- Članom 44. u stavu (2) propisana je struktura Upravnog odbora Fonda i da isti broji 7 članova, ali je samo za tri člana propisano iz kojeg reda se imenuju, dok za preostala četiri člana Upravnog odbora nije propisan red ispred kojeg se imenuju članovi. Smatramo da je isto potrebno propisati radi osiguranja zakonite i transparentne primjene propisa u praksi.

S poštovanjem,

**Dostavljeno:**

1x Naslov

1x a/a





Broj: 01-30-2919-1/24  
Zenica, 16.02.2024. godine

Na osnovu člana 22. i 40. Poslovnika Skupštine Zeničko-dobojskog kantona-Treći Prečišćeni tekst („Službene novine Zeničko-dobojskog kantona“, broj: 14/18, 18/18 isp., 7/19, 7/20 i 16/23), Komisija za rad, socijalnu politiku, izbjeglice i zdravstvo Skupštine Zeničko-dobojskog kantona na 13. sjednici, održanoj dana **16.02.2024. godine**, razmatrala je sljedeći:

### DNEVNI RED

1. Prednacrt Zakona o organizaciji penzijskog i invalidskog osiguranja Federacije Bosne i Hercegovine  
- Utvrđivanje mišljenja Skupštine –
2. Prednacrt Zakona o profesionalnoj rehabilitaciji i zapošljavanju lica sa invaliditetom  
- Utvrđivanje mišljenja Skupštine –
3. Informacija o stanju u oblasti zapošljavanja na području Zeničko-dobojskog kantona.

o čemu Skupštini Kantona podnosi sljedeći:

### IZVJEŠTAJ

T/1

Po završenom razmatranju Prednacrta Zakona o organizaciji penzijskog i invalidskog osiguranja Federacije Bosne i Hercegovine, Komisija je podržala mišljenje Ministarstva za rad, socijalnu politiku i izbjeglice Zeničko-dobojskog kantona dato na Prednacrt navedenog akta, koje je Vlada Kantona prihvatila Zaključkom broj: 02-02-1911/24 od 29.01.2024. godine, te je jednoglasno, sa 4 glasa „za“ (od 4 prisutna člana), predložila Skupštini Kantona da mišljenje Ministarstva bude sastavni dio zaključka Skupštine Kantona o navedenom Prednacrtu Zakona.

T/2

Po završenom razmatranju Prednacrta (federalnog) Zakona o profesionalnoj rehabilitaciji i zapošljavanju lica sa invaliditetom, Komisija je podržala mišljenje Ministarstva za rad, socijalnu politiku i izbjeglice Zeničko-dobojskog kantona dato na Prednacrt navedenog akta, koje je Vlada Kantona prihvatila Zaključkom broj: 02-02-2676/24 od 09.02.2024. godine, te je jednoglasno, sa 4 glasa „za“ (od 4 prisutna člana), predložila Skupštini Kantona da mišljenje Ministarstva bude sastavni dio zaključka Skupštine Kantona o navedenom Prednacrtu Zakona.

T/3

Nakon završenog razmatranja Informacije o stanju u oblasti zapošljavanja na području Zeničko-dobojskog kantona, Komisija je istu jednoglasno, sa 4 glasa „za“ (od 4 prisutna člana) podržala i predložila Skupštini Kantona da navedenu Informaciju prihvati.

#### Dostavljeno:

- 1x Poslasticima Skupštine Kantona,
- 1x Vladi Kantona, *n/r sekretara*,
- 1x Ministarstvo za rad, socijalnu politiku i izbjeglice, *n/r ministra*,
- 1x Predmet 13. sjednice Komisije/04-02



329



Bosna i Hercegovina  
Federacija Bosne i Hercegovine  
Bosansko-podrinjski kanton Goražde  
SKUPŠTINA KANTONA

Босна и Херцеговина  
Федерација Босне и Херцеговине  
Босанско-подрињски кантон Горажде  
СКУПШТИНА КАНТОНА

06/03

Broj: 01-02-860-4/23  
Goražde, 06. marta 2024. godine

BOSNA I HERCEGOVINA  
FEDERACIJA BOSNE I HERCEGOVINE  
FEDERALNO MINISTARSTVO  
RADA I SOCIJALNE POLITIKE  
SARAJEVO  
broj: 06-02/1-3925/23  
13-03-2024  
Sarajevo,

**PREDMET:** Dostava zaključka.-

*Jošip*  
*M*

Poštovani,

U prilogu akta dostavljamo Vam zaključak o davanju Mišljenja na Prednacrt Zakona o profesionalnoj rehabilitaciji i zapošljavanju lica sa invaliditetom, koji je donijela Skupština Bosansko-podrinjskog kantona Goražde, na 11. redovnoj sjednici, održanoj 06. marta 2024. godine.

S' poštovanjem!

**DOSTAVLJENO:**

1. Federalnom ministarstvu rada i socijalne politike, Hamdije Čemerlića 2, 71000 Sarajevo,
2. Vladi BPK-a Goražde,
3. Ministarstvu za socijalnu politiku, zdravstvo, raseljena lica i izbjeglice BPK-a Goražde,
4. a/a.

**PREDSJEDAVAJUĆI SKUPŠTINE**  
*Mirsad Šanlić*  
 Goražde





Broj: 01-02-860-3/23  
Goražde, 06. marta 2024. godine

Skupština Bosansko-podrinjskog kantona Goražde, na 11. redovnoj sjednici, održanoj 06. marta 2024. godine, razmatrala je Davanje mišljenja na Prednacrt Zakona o profesionalnoj rehabilitaciji i zapošljavanju lica sa invaliditetom, pa na osnovu člana 109. i 111. Poslovnika Skupštine Bosansko-podrinjskog kantona Goražde ("Službene novine Bosansko-podrinjskog kantona Goražde", broj: 3/18 i 6/19), **donosi:**

### ZAKLJUČAK

1. Skupština Bosansko-podrinjskog kantona Goražde prihvata Mišljenje Ministarstva za socijalnu politiku, zdravstvo, raseljena lica i izbjeglice Bosansko-podrinjskog kantona Goražde, broj: 08-02-6-1/24 od 22.01.2024. godine, koje je Vlada Bosansko-podrinjskog kantona Goražde prihvatila svojim Zaključkom, broj: 03-02-144/24 od 25.01.2024. godine, i isto se smatra Mišljenjem Skupštine Bosansko-podrinjskog kantona Goražde na Prednacrt Zakona o profesionalnoj rehabilitaciji i zapošljavanju lica sa invaliditetom.
2. Zaključak stupa na snagu danom donošenja.

#### DOSTAVLJENO:

- ① Federalnom ministarstvu rada i socijalne politike, Hamdije Čemerlića 2, 71000 Sarajevo,
2. Vladi BPK-a Goražde,
3. Ministarstvu za socijalnu politiku, zdravstvo, raseljena lica i izbjeglice BPK-a Goražde,
4. a/a.



*Bosna i Hercegovina*  
*Federacija Bosne i Hercegovine*  
*Bosansko-podrinjski kanton Goražde*  
**VLADA KANTONA**

Broj: 03-02-144/24  
Goražde, 25.01.2024. godine


Na osnovu člana 23. i 24. Zakona o Vladi Bosansko-podrinjskog kantona Goražde (Službene novine Bosansko-podrinjskog kantona Goražde» broj: 8/15), Vlada Bosansko-podrinjskog kantona Goražde na 61. redovnoj sjednici, održanoj dana 25.01.2024. godine, *donosi*:

### ZAKLJUČAK

1. Vlada Bosansko-podrinjskog kantona Goražde razmatrala je Mišljenje na Prednacrt Zakona o profesionalnoj rehabilitaciji i zapošljavanju lica sa invaliditetom dostavljeno od Ministarstva za socijalnu politiku, zdravlje, raseljena lica i izbjeglice i upućuje isti Skupštini Bosansko-podrinjskog kantona Goražde u dalju proceduru, kao svoje mišljenje.
2. Zaključak stupa na snagu danom donošenja.

#### DOSTAVLJENO:

1. Premijeru BPK-a Goražde,
2. Skupštini BPK-a Goražde,
3. Ministarstvima-svim,
4. Evidenciji,
5. a/a.-





Bosna i Hercegovina  
Federacija Bosne i Hercegovine  
BOSANSKO-PODRINJSKI KANTON GORAŽDE

22-01-2024	broj prijloga
0802 -	860-2103

Bosna i Hercegovina  
Federacija Bosne i Hercegovine  
Bosansko - podrinski kanton Goražde  
MINISTARSTVO ZA SOCIJALNU POLITIKU,  
ZDRAVSTVO, RASELJENA LICA I IZBJEGLICE

Bosnia and Herzegovina  
Federation of Bosnia and Herzegovina  
Bosnian-podrinje canton Gorazde  
MINISTRY FOR SOCIAL AFFAIRS, HEALTH,  
DISPLACED PERSONS AND REFUGEES

Босна и Херцеговина  
Федерација Босне и Херцеговине  
Босанско - подрински кантон Горажде  
МИНИСТАРСТВО ЗА СОЦИЈАЛНУ ПОЛИТИКУ,  
ЗДРАВСТВО, РАСЕЉЕНА ЛИЦА И ИЗБЈЕГЛИЦЕ

Broj: 08-02-6-1/24  
Goražde, 22.01.2024. godine

SKUPŠTINA BOSANSKO-PODRINJSKOG KANTONA GORAŽDE  
n/r Predsjedavajućeg Skupštine  
VLADA BOSANSKO-PODRINJSKOG KANTONA GORAŽDE  
n/r Sekretara Vlade

**PREDMET:** Mišljenje na Prednacrt Zakona o profesionalnoj rehabilitaciji i zapošljavanju lica sa invaliditetom, dostavlja se,-

Poštovani,

U skladu sa aktom Skupštine Bosansko-podrinjskog kantona Goražde broj: 01-02-860-1/23 od 28.12.2023. godine naslovljenim Vladi Bosansko-podrinjskog kantona Goražde, a kojeg je Vlada kantona presignirala na Ministarstvo za socijalnu politiku, zdravstvo, raseljena lica i izbjeglice dana 03.01.2024. godine, Ministarstvo za socijalnu politiku, zdravstvo, raseljena lica i izbjeglice Bosansko-podrinjskog kantona Goražde pristupilo je razmatranju teksta Prednacrtu Zakona o profesionalnoj rehabilitaciji i zapošljavanju lica sa invaliditetom, te dostavlja sljedeće:

## MIŠLJENJE

### I. Opća zapažanja u vezi predloženog propisa

Uzimajući u obzir da se ovim zakonom, pored ostalih pitanja koja su regulisana istim, stvaraju povoljniji uslovi za povećanje zaposlenosti lica sa invaliditetom i njihovo ravnopravno sudjelovanje na tržištu rada, kao i poboljšanje uslova za profesionalnu rehabilitaciju i osposobljavanje lica sa invaliditetom, Ministarstvo za socijalnu politiku, zdravstvo, raseljena lica i izbjeglice Bosansko-podrinjskog kantona Goražde podržava donošenje predmetnog zakona, te smatra da predloženi tekst Prednacrtu zakona predstavlja dobru polaznu osnovu za utvrđivanje i donošenje teksta prijedloga predmetnog zakona.

U cilju poboljšanja teksta predmetnog zakona, te ukazivanja na još uvijek nedovoljno definirane odredbe i predložena zakonska rješenja, Ministarstvo za socijalnu politiku, zdravstvo, raseljena lica i izbjeglice Bosansko-podrinjskog kantona Goražde, u nastavku dostavlja svoje prijedloge za izmjene i dopune pojedinih članova predmetnog Prednacrt zakona.

## II. Komentari, primjedbe i prijedlozi na pojedine odredbe predloženog propisa

### POGLAVLJE II. PROFESIONALNA REHABILITACIJA I OSPOSOBLJAVANJE LICA SA INVALIDITETOM (čl. 7. - 11.)

Odredbe na koje se daju primjedbe:

#### Član 9.

(Priznavanje prava na profesionalnu rehabilitaciju lica sa invaliditetom)

(1) O priznavanju prava na profesionalnu rehabilitaciju u prvom stepenu odlučuje kantonalna služba za zapošljavanje nadležna prema prebivalištu lica sa invaliditetom.

(2) Postupak za priznavanje prava iz stava (1) ovog člana pokreće se na osnovu zahtjeva lica sa invaliditetom.

(3) Uz zahtjev se prilaže dokaz o utvrđenom invaliditetu, odnosno smanjenoj i preostaloj radnoj sposobnosti.

(4) O žalbi protiv prvostepenog rješenja službe iz stava (1) ovog člana odlučuje kantonalno ministarstvo nadležno za rad i socijalnu politiku.

**Predlažemo da se u članu 9. Prednacrt zakona u stavu (4) riječi: „i socijalnu politiku“ brišu.**

Komentar i obrazloženje:

Imajući u vidu činjenicu da su u pojedinim kantonima oblasti rada i socijalne politike odvojeni, odnosno da ove oblasti nisu u nadležnosti jednog ministarstva, neophodno je ovim članom zakona jasno precizirati da o žalbama protiv prvostepenih rješenja kantonalne službe za zapošljavanje, odlučuje kantonalno ministarstvo nadležno za rad, kako bi se u praksi izbjegle dileme i nejasnoće oko toga koji kantonalni organ uprave provodi drugostepeni postupak.

#### Član 11.

(Ustanova za profesionalnu rehabilitaciju)

(1) Ustanova za profesionalnu rehabilitaciju, u smislu ovog Zakona je ustanova za organiziranje i provođenje profesionalne rehabilitacije lica sa invaliditetom, u skladu sa odredbom člana 8. ovog zakona.

- (2) Ustanovu mogu osnovati Federacija, kanton, jedinica lokalne uprave, Federalni zavod za zapošljavanje, udruženje lica sa invaliditetom, humanitarna organizacija, vjerska zajednica i druga pravna i fizička lica.
- (3) Bliže uslove za osnivanje i rad ustanove, posebno u pogledu prostora, opreme i stručnog kadra, propisuje kantonalni ministar nadležan za poslove socijalne zaštite.
- (4) Sredstva za rad ustanove osiguravaju osnivač i Fond.
- (5) Ustanova može ostvariti prihode i pružanjem usluga korisnicima, prodajom proizvoda nastalih u toku profesionalne rehabilitacije, od poklona, legata i drugih izvora u skladu sa aktom o osnivanju ustanove.
- (6) Organ rukovođenja u ustanovi za profesionalnu rehabilitaciju lica sa invaliditetom je upravni odbor koji broji pet članova, od njih najmanje jedan član treba da bude lice sa invaliditetom. Rad organa upravljanja u ustanovi za profesionalnu rehabilitaciju je javan, izuzev kada se radi o pitanjima lične prirode lica sa invaliditetom.
- (7) Organ rukovođenja u ustanovi za profesionalnu rehabilitaciju je direktor. Za direktora ustanove može biti imenovan državljanin Bosne i Hercegovine koji ima visoku stručnu spremu VII stepen, odnosno visoko obrazovanje prvog ciklusa ili drugog ili trećeg Bolonjskog sistema studiranja, i najmanje pet godina radnog iskustva na poslovima rukovođenja, te tri godine iskustva u oblasti prava i zaštite lica sa invaliditetom. Statutom ustanove se preciziraju opći i posebni uvjeti za postupak izbora i imenovanja direktora.
- (8) Organ kontrole poslovanja u ustanovi za profesionalnu rehabilitaciju lica sa invaliditetom je nadzorni odbor koji broji tri člana, od njih najmanje jedan član treba da bude lice sa invaliditetom.
- (9) Na rad i djelovanje, te postupak imenovanja i razrješenja organa iz st. (6), (7) i (8) ovog člana primjenjuju se važeći propisi i opći akt ustanove za profesionalnu rehabilitaciju.

**Predlažemo da se u članu 11. Prednacrtu zakona u stavu (3) riječi: „*propisuje kantonalni ministar nadležan za poslove socijalne zaštite*“ zamjene riječima: „*federalni ministar rada i socijalne politike*“.**

Komentar i obrazloženje:

Predlažemo da bliže uslove za osnivanje i rad ustanova za profesionalnu rehabilitaciju, posebno u pogledu prostora, opreme i stručnog kadra, propisuje federalni ministar rada i socijalne politike, kako je to propisano članom 10. st. (4) Prednacrtu zakona. Kako se radi o krovnom federalnom propisu a s ciljem uspostavljanja jedinstvenih standarda i normativa u pogledu osnivanja ustanova za profesionalnu rehabilitaciju i izvođenja profesionalne rehabilitacije na području cijele FBiH, smatramo ovaj prijedlog opravdanim.

POGLAVLJE VII. NADZOR I KAZNE NE ODREDBE (čl. 47. - 50.)

Odredbe na koje se daju primjedbe:

Član 48.

(Nadzor nad zakonitošću rada)

(1) Nadzor nad zakonitošću rada i zakonitošću općih akata Fonda vrši federalno ministarstvo nadležno za rad.

(2) Nadzor nad stručnim radom ustanova za profesionalnu rehabilitaciju kojima je osnivač Federacija vrši federalno ministarstvo nadležno za rad, dok kantonalna ministarstva nadležna za poslove rada i socijalne politike vrši nadzor nad stručnim radom ostalih ustanova za profesionalnu rehabilitaciju prema sjedištu, bez obzira ko je osnivač.

(3) Sadržaj i način provođenja nadzora iz st.1. i 2. Ovog člana propisuju ministri nadležni za rad i socijalnu politiku.

**Predlažemo da se u članu 48. Prednacrtu zakona u stavovima (2) i (3) riječi: „i socijalne/u politike/u“ brišu.**

Komentar i obrazloženje:

Kako je ovim članom definirano da nadzor nad zakonitošću rada i stručni nadzor na federalnom nivou vrši federalno ministarstvo nadležno za rad, slijedom te analogije neophodno je da i na kantonalnom nivou ovu vrstu nadzora obavljaju kantonalna ministarstva nadležna za oblast rada.


S poštovanjem,

Akt pripremio:

mr.sci. Muhamed Hadžić

Dostavljeno:

- Naslovu;  
- a/a



MINISTAR


Senad Čeljo



06/EC

Broj: 02-02-665- 6 /23  
Tuzla, 23.02.2024. godine

BOSNA I HERCEGOVINA  
Federacija Bosne i Hercegovine  
Federalno ministarstvo rada i socijalne politike  
- n/r ministra -



**PREDMET: Zaključak, dostavlja se**

U prilogu Vam dostavljamo zaključak Skupštine Tuzlanskog kantona broj: 01-02-665-5/23 od 21.02.2024. godine u vezi sa prednacrtom federalnog Zakona o profesionalnoj rehabilitaciji zapošljavanju lica sa invaliditetom.

Također Vam dostavljamo:

- Mišljenje Ministarstva za rad, socijalnu politiku i povratak Tuzlanskog kantona,
- Izvještaj Komisije za rad i socijalnu politiku Skupštine Tuzlanskog kantona broj: 02-02-665-4/23 od 20.02.2024. godine i
- Primjedbe iznesene u Mišljenju JU Zavod za odgoj i obrazovanje osoba sa smetnjama u psihičkom i tjelesnom razvoju Tuzla broj: 01-218/24 od 20.02.2024.g.

S poštovanjem,

DOSTAVLJENO:

- 1 x Naslovu
- 1 x Evidenciji
- 1 x Arhivu



Sekretar  
Skupštine Tuzlanskog kantona  
Enisa Hasanagić

Na osnovu člana 111. stav (2) Poslovnika Skupštine Tuzlanskog kantona („Službene novine Tuzlanskog kantona“ br. 13/19 i 5/20), razmatrajući prednacrt federalnog Zakona o profesionalnoj rehabilitaciji i zapošljavanju lica sa invaliditetom, Skupština Tuzlanskog kantona, na sjednici od 21.02.2024. godine, donosi

## ZAKLJUČAK

### I.


Skupština Tuzlanskog kantona prihvata Mišljenje Ministarstva za rad, socijalnu politiku i povratak Tuzlanskog kantona i Izvještaj Komisije za rad i socijalnu politiku Skupštine Tuzlanskog kantona sa primjedbama iznesenim u Mišljenju JU Zavod za odgoj i obrazovanje osoba sa smetnjama u psihičkom i tjelesnom razvoju Tuzla na prednacrt federalnog Zakona o profesionalnoj rehabilitaciji i zapošljavanju lica sa invaliditetom.

### II.

Mišljenje i izvještaj iz tačke I. ovog zaključka uputit će se Federalnom ministarstvu rada i socijalne politike.

Bosna i Hercegovina  
-Federacija Bosne i Hercegovine  
TUZLANSKI KANTON  
Skupština

Broj: 01-02- 665 - 5 /23  
Tuzla, 21.02.2024. godine



Predsjednik  
Skupštine Tuzlanskog kantona

Žarko Vujović



BOSNA I HERCEGOVINA  
Federacija Bosne i Hercegovine  
Tuzlanski kanton  
MINISTARSTVO ZA RAD, SOCIJALNU  
POLITIKU I POVRATAK

Broj: 09/1-02-2807/24  
Tuzla, 07.02.2024. godine

**MIŠLJENJE**  
**na tekst Prednacrtu Zakona o profesionalnoj rehabilitaciji i zapošljavanju lica sa invaliditetom**


Ministarstvo za rad, socijalnu politiku i povratak Tuzlanskog kantona razmotrilo je tekst Prednacrtu Zakona o profesionalnoj rehabilitaciji i zapošljavanju lica sa invaliditetom predloženog od strane Federalnog ministarstva rada i socijalne politike i u potpunosti podržavamo predloženi Prednacrt Zakona.

**Obrazloženje**

S obzirom na činjenicu da je Prednacrt Zakona o profesionalnoj rehabilitaciji i zapošljavanju lica sa invaliditetom uradila Radna grupa imenovana od strane Federalnog ministarstva rada i socijalne politike koja je bila sastavljena od predstavnika tog Ministarstva i ostalih relevantnih organa i institucija i da Prednacrt Zakona sadrži sve odredbe koje su potrebne da bi se na potpun i sveobuhvatan način regulisala navedena materija uključujući: uslove zapošljavanja lica sa invaliditetom s ciljem stimulisanja zapošljavanja osoba sa invaliditetom pod općim uvjetima, pitanja koja se odnose na uslove i postupak za priznavanje statusa privrednih društava za zapošljavanje osoba sa invaliditetom i zaštitnih radionica, kontrolu naplate posebnog doprinosa za zapošljavanje osoba sa invaliditetom, uslove za izbor i imenovanje direktora, upravnog i nadzornog odbora Fonda za profesionalnu rehabilitaciju i zapošljavanje osoba sa invaliditetom, te i ostala pitanja od značaja za poboljšavanje uslova za profesionalnu rehabilitaciju, osposobljavanje i zapošljavanje osoba sa invaliditetom i da je u pitanju Prednacrt Zakona, nakon kojeg će se izraditi Nacrt Zakona koji će biti stavljen na javnu raspravu u kojem će ponovo učestvovati ovo Ministarstvo, kao i ostali nadležni organi i institucije, Ministarstvo smatra da je donošenje Prednacrtu Zakona opravdano i osnovano i da su nova rješenja u Zakonu dobro koncipirana, te je odlučeno da se da pozitivno mišljenje.

DOSTAVLJENO:

1 x Naslovu,  
1 x Evidenciji,  
1 x Arhivi.



MINISTAR  
*Fadil Alić*  
Fadil Alić


Na osnovu člana 26. Poslovnika Skupštine Tuzlanskog kantona ("Službene novine Tuzlanskog kantona" br. 13/19 i 5/20) i člana 21. stav 3. Poslovnika o radu Komisije za rad i socijalnu politiku Skupštine Tuzlanskog kantona broj: 02-02-363-2/20 od 3.6.2020. godine, Komisija za rad i socijalnu politiku održala je sjednicu 20.02.2024. godine, te Skupštini Tuzlanskog kantona, podnosi

## IZVJEŠTAJ

Komisija za rad i socijalnu politiku Skupštine Tuzlanskog kantona je razmatrala i podržala prednacrt federalnog Zakona o profesionalnoj rehabilitaciji i zapošljavanju lica sa invaliditetom i mišljenje Ministarstva za rad, socijalnu politiku i povratak Tuzlanskog kantona uz prijedlog zaključka da primjedbe iznesene u Mišljenju JU Zavod za odgoj i obrazovanje osoba sa smetnjama u psihičkom i tjelesnom razvoju Tuzla, broj: 01-218/24 od 20.02.2024.godine, budu sastavni dio Zaključka Skupštine Tuzlanskog kantona koji će biti upućen Federalnom ministarstvu rada i socijalne politike u vezi sa razmatranim prednacrtom gore pomenutog federalnog zakona.

Bosna i Hercegovina  
- Federacija Bosne i Hercegovine -  
TUZLANSKI KANTON  
Skupština  
- Komisija za rad i socijalnu politiku -

Broj: 02-02-665- 4 /23  
Tuzla, 20.02.2024. godine



Predsjedavajuća  
Komisije za rad i socijalnu politiku

Hasiba Kurtić

*Hasiba Kurtić* 19669

272

Oged

BOSNA I HERCEGOVINA  
FEDERACIJA BOSNE I HERCEGOVINE  
KANTON SREDIŠNJA BOSNA/SREDNJOBOSANSKI KANTON  
SABOR/SKUPŠTINA

FEDERALNO  
MINISTARSTVO  
RADA I  
SOCIJALNE POLITIKE  
Broj: 06-02/1-3925/23  
Sarajevo, 13-02-2024

Na temelju članka 110. Poslovnika Sabora Kantona Središnja Bosna ("Službene novine Kantona Središnja Bosna", broj: 3/04, 6/13 i 16/20), povodom razmatranja Mišljenja na federalni Prednacrt zakona o profesionalnoj rehabilitaciji i zapošljavanju osoba s invaliditetom, Sabor Kantona na X. sjednici održanoj dana 20.02.2024. godine, d o n o s i:

## ZAKLJUČAK

*Jovip*  
*M*

### I.

Sabor Kantona Središnja Bosna prihvća Zaključak Vlade Kantona Središnja Bosna broj 01-04.1-333/2024-8 od 18.01.2024. godine kojim se prihvća mišljenje Ministarstva gospodarstva navedeno u aktu broj: 05-30-110/24 od 05.01.2024. godine, a koji čine sastavni dio ovog Zaključka.

### II.

Ovaj Zaključak stupa na snagu danom donošenja, a dostavit će se Federalnom ministarstvu rada i socijalne politike, Ministarstvu gospodarstva Kantona Središnja Bosna i Vladi Kantona.

Broj: 01-02-170/24  
Travnik, 20.02.2024.godine



Na osnovi članka 31. Zakona o Vladi Kantona Središnja Bosna (Službene novine Kantona Središnja Bosna, broj 5/03- prečišćeni tekst i 14/03), Vlada Kantona Središnja Bosna, na 30. sjednici, održanoj 18. 1. 2024. godine, razmatrajući **Ad. 8. Mišljenje na federalni Prednact zakona o profesionalnoj rehabilitaciji i upošljavanju osoba sa invaliditetom, donosi**

## ZAKLJUČAK


### I.

Vlada Kantona prihvća Mišljenje Ministarstva gospodarstva na federalni Prednact zakona o profesionalnoj rehabilitaciji i upošljavanju osoba sa invaliditetom iz akta broj 05-30-110/24 od 5. 1. 2024. godine.


### II.

Navedeno Mišljenje dostaviti će se Saboru Kantona na daljnje postupanje.

Broj: 01-04.1-333/2024 – 8  
Travnik, 18. 1. 2024.



**PREDSJEDNIK VLADE KANTONA**  
**Tahir Lendo, dipl. ing.**



Broj: 05-30-110/24  
Travnik, 05.01.2024. godine

Vlada Srednjobosanskog kantona

**Predmet: Mišljenje na federalni Prednacrt Zakona o profesionalnoj rehabilitaciji i upošljavanju osoba s invaliditetom**

Poštovani,

Ministarstvu privrede od strane Skupštine Srednjobosanskog kantona dostavljen je dopis broj: 01-02-1317-1/23 od 27.12.2023.godine, kojim se traži mišljenje na federalni Prednacrt Zakona o profesionalnoj rehabilitaciji i upošljavanju osoba s invaliditetom.

Dostavljeni tekst Prednacrt Zakona o profesionalnoj rehabilitaciji i upošljavanju osoba s invaliditetom ima za cilj stvoriti bolje uslove i osigurati jednake mogućnosti za zapošljavanje osobama s invaliditetom, propisujući mjere podrške i otklanjajući barijere kako bi se omogućilo osobama s invaliditetom da sudjeluju u društvenom i profesionalnom životu.

Naime, implementacija postojećeg Zakona o profesionalnoj rehabilitaciji, osposobljavanju i zapošljavanju osoba sa invaliditetom koji je donesen 2010.godine, pokazala je da postoji potreba za njegovim izmjenama i dopunama, a radna grupa za izmjene i dopune istog, koju je imenovalo Federalno ministarstvo rada i socijalne politike uz učešće značajnog broja aktera, sačinila je prijedlog koji je sadržavao izmjenu više od 50 % teksta, tako da se pristupilo izradi potpuno novog Zakona

Dostavljenim tekstom Prednacrt Zakona između ostalog daje se definicija lica sa invaliditetom, postupak i način utvrđivanja invaliditeta i smanjene radne sposobnosti, daje se doprinos profesionalnoj rehabilitaciji kroz školovanje, mjere i aktivnosti profesionalne rehabilitacije, priznavanje prava na rehabilitaciju, način izvođenja rehabilitacije, osnivanje ustanova za rehabilitaciju, vođenje evidencije o nezaposlenim licima sa invaliditetom, zapošljavanje lica sa invaliditetom, određuju prednosti pri zapošljavanju uz obavezu poslodavaca na zapošljavanje istih pod određenim uslovima, te predviđa osnivanje privrednih društava za zapošljavanje osoba sa invaliditetom. Također, novim Zakonom predviđene su olakšice za poslodavce koji zapošljavaju lica sa invaliditetom, utvrđene su nadležnosti Fonda za profesionalnu rehabilitaciju, njegovo funkcionisanje, način upravljanja, donošenje podzakonskih akata, usklađivanje općih akata Fonda i prestanak postojećeg Zakona o profesionalnoj rehabilitaciji, osposobljavanju i zapošljavanju osoba sa invaliditetom.

Razmatrajući dostavljeni tekst federalnog Prednacrta Zakona o profesionalnoj rehabilitaciji i upošljavanju osoba s invaliditetom smatramo da isti otvara nove mogućnosti koje treba da potaknu poslodavce na zapošljavanje većeg broja osoba sa invaliditetom i omogući kvalitetnije upravljanje sredstvima namijenjenim za profesionalnu rehabilitaciju i zapošljavanje osoba sa invaliditetom. dok je osnivanje zaštitnih radionica odnosno privrednih društava za zapošljavanje osoba sa invaliditetom predviđeno kao model zapošljavanja osoba sa invaliditetom koje nisu u mogućnosti da budu učesnici slobodnog tržišta rada, te predlažemo da Vlada Srednjobosanskog kantona da pozitivno mišljenje na isti.

S poštovanjem,



MINISTAR

dr. sci. Sedžad Milanović

Bosna i Hercegovina  
FEDERACIJA BOSNE I HERCEGOVINE  
ŽUPANIJA POSAVSKA

Ministarstvo gospodarstva, rada i prostornog uređenja

Broj: 09-02-1/24  
Odžak, 08.01.2024. godine

*Jorip*  
*Mu*

Tel/fax: 031/762-701, tel. 031/763-439

44

*D. K.*

06-02/1-3925/23  
11-01-2024

FEDERALNO MINISTARSTVO RADA I  
SOCIJALNE POLITIKE

Predmet: Mišljenje na Prednacrt Zakona o profesionalnoj rehabilitaciji i upošljavanju osoba s invaliditetom, dostavlja se;

Poštovani,

U vezi s dopisom Skupštine Županije Posavske broj 01-45-112-2/23 od 29.12.2023. godine, uz koji je dostavljen Prednacrt Zakona o profesionalnoj rehabilitaciji i upošljavanju osoba s invaliditetom (u daljnjem testu: Prednacrt zakona) upućen od Federalnog ministarstva rada i socijalne politike, u kojem se traži da se navedeni Prednacrt zakona razmotri te da se dostavi mišljenje na isti, ovim putem dostavljamo Vam mišljenje na tekst Prednacrt zakona.

Nakon uvida u Prednacrt zakona Ministarstvo gospodarstva, rada i prostornog uređenja Županije Posavske (u daljnjem tekstu: Ministarstvo) daje pozitivno mišljenje na isti i podržava nastojanje nadležnog ministarstva da se osigura poboljšanje zakonodavno-pravnog okvira za zapošljavanje osoba s invaliditetom, poboljšanje uvjeta za profesionalnu rehabilitaciju, rad Fonda za profesionalnu rehabilitaciju i upošljavanje osoba s invaliditetom, kao i drugih pitanja od značaja za ovu oblast, posebno ističemo preuzimanje pravne Direktive Vijeća 2000/78/EZ od 27. studenog 2000. o uspostavi općeg okvira za jednako postupanje pri zapošljavanju i obavljanju zanimanja (SL L 303, 02/12/2000) u dijelu koji se odnosi na zapošljavanje osoba s invaliditetom.

Međutim, pored pozitivnog mišljenja koje ovo Ministarstvo ima u svezi Prednacrt zakona, nismo suglasni s određenim odredbama te predlažemo izmjenu istih, kako slijedi:

1. U članku 9. (4) Prednacrt zakona koji glasi:  
„O žalbi protiv prvostupanjskog rješenja službe iz stavka (1) ovoga članka odlučuje županijsko ministarstvo nadležno za rad i socijalnu politiku“,  
potrebno je brisati riječi „rad i“ ili riječi „i socijalnu politiku“, s obzirom da sva kantonalna/županijska ministarstva nadležna za poslove rada na području Federacije BiH ne obavljaju poslove iz oblasti socijalne politike, nego su isti u nadležnosti drugog kantonalnog/županijskog ministarstva.

Isto je potrebno uraditi i u članku 48. (2) i (3) Prednacrt zakona.

2. U članku 20. (1) Prednacrt zakona nije jasno definiran uvjet najmanjeg postotka invaliditeta osobe utvrđenog od strane Instituta za medicinsko vještačenje zdravstvenog stanja koju je poslodavac dužan zaposliti srazmjerno ukupnom broju zaposlenih, te

Ministarstvo predlaže jasnije definiranje u tekstu Prednacrtu zakona ili donošenje posebnog Pravilnika kojim će se definirati isto, vodeći računa o stupnju i vrsti invaliditeta i u tom smislu osigurati jednakost.

3. U članku 20. (5) Prednacrtu zakona potrebno je riječ „dporinosa“ zamijeniti riječju „doprinosa“.
4. U članku 20. (7) Prednacrtu zakona potrebno je riječ „obaezu“ zamijeniti riječju „obavezu“.
5. U članku 24. (1) f) Prednacrtu zakona potrebno je riječ „inaviiditetom“ zamijeniti riječju „invaliditetom“.
6. U članku 27. (4) Prednacrtu zakona potrebno je riječ „dužna“ zamijeniti riječju „dužno“.
7. U članku 28. (3) Prednacrtu zakona koji glasi:  
„Protiv Rješenja iz stavka (1) ovoga članka žalba nije dopuštena, ali se može pokrenuti upravni spor pred nadležnim sudom u roku od 30 dana.“,  
iza riječi „dana“ potrebno je dodati riječi „od dana prijema Rješenja“, s obzirom da nije definirano od kada počinje rok od 30 dana za pokretanje upravnog spora, isto je potrebno dodati i u članku 31. (3) iza riječi „dana“.
8. U članku 32. (3) Prednacrtu zakona potrebno je riječ „slube“ zamijeniti riječju „službe“.
9. U članku 34. (3) Prednacrtu zakona riječ „utvđuje“ potrebno je zamijeniti riječju „utvrđuje“.
10. U članku 39. (4) Prednacrtu zakona potrebno je ispred riječi „općinski“ dodati riječi „gradski ili“, s obzirom na nadležnost tijela uprave.
11. U sedmom dijelu Prednacrtu zakona – Nadzor i kaznene odredbe propisane su prekršajne kazne. Stav Ministarstva je da se kazni bilo koje neispunjavanje zakonskih obveza, ali s našeg gledišta kazne u kaznenim odredbama ovog Prednacrtu zakona su neprimjereno visoke, te predlažemo da one ostanu iste kao i u trenutno važećem Zakonu o profesionalnoj rehabilitaciji, osposobljavanju i upošljavanju osoba s invaliditetom („Službene novine FBiH“, broj: 9/10).
12. U članku 52. Prednacrtu zakona gdje je propisano donošenje i usklađivanje podzakonskih akata, uočena je tehnička greška, te je potrebno umjesto pozivanja na članak 47. stavak (3), pozvati se na članak 47. stavak (2) i umjesto pozivanja na članak 48. stavak (2) pozvati se na članak 48. stavak (3).

Nadamo se da ćete razmotriti primjedbe i sugestije na predloženi Prednacrt zakona i iste uvažiti, a s obzirom da se radi o prvoj fazi izrade zakona, nadamo se da ćemo imati još prilike dati svoj doprinos na izradi što kvalitetnijih rješenja u predmetnoj zakonskoj regulativi, u fazi donošenja Nacrtu Zakona o profesionalnoj rehabilitaciji i zapošljavanju osoba s invaliditetom.

S poštovanjem,



MINISTAR

Dragutin Živković, dipl.ing.stroj